



南北史補志卷九

江甯汪士鐸

五行志第一

宋志昔鼎雉庭穀之異鑑悟後王仲尼作春秋具書祥眚逮至伏
生勅紀大傳五行之體始詳劉向廣演鴻範休咎之文益備故班
固斟酌經傳詳紀條流司馬彪纂集光武以來以究漢事王沈魏
書志篇闕佚凡厥災異但編帝紀而已高堂隆郭景純等據經立
辭終皆顯應然則隋志易以八卦定吉凶則庖犧所以稱聖也書
以九疇論休咎則大禹所以爲明也春秋以災祥驗行事仲尼
所以垂法也伏生董仲舒京房劉向之倫言災異有足觀者所以
魏志仰瞻俯察戒德慎行弭譴咎致休禎也克躬修政畏天敬神
雖休勿休而不敢怠君道得則和氣應休徵生矣若隋志梁武之

降號伽藍齊文宣之般游市里陳則蔣山之鳥呼曰奈何周則陽
武之魚乘空而鬪隋則鵲巢黼帳火炎門闕豈惟天道抑亦人妖
崇信巫史重增愆罰昔懷王事神而秦兵逾進萇宏尙鬼而諸侯
不來往者生之靜也欲者心之使也置情攸往引類同歸乳於
空城之側鵲集於鼎耳之上短長之制旣曰由人黔隧崇山同車
共軫誰爲神道是成倚伏一則以爲殃豐一則以爲休徵故曰德
勝不祥而義厭不惠又按宋志言之不從有介蟲之孽劉歆以爲
毛蟲視之不明有羸蟲之孽劉歆以爲羽蟲按月令夏蟲羽秋蟲
毛宜如歆說是以舊史從之

鴻範五行傳曰爰用五事建用王極長事一曰貌貌之不恭是謂
不肅厥咎狂

宋明帝泰始中幸臣阮佃夫勢傾朝廷室宇豪麗車服鮮明

乘車常偏向一邊違正立執綬之體時人多慕效此亦貌不
恭之失也時偏左之化行方正之道廢矣後廢帝常單騎遨
遊出入市里營寺未嘗御輦終以隕滅南史齊永元中踰池
水立紫閣諸樓壁上畫男女私褻之象潘妃生女百日而亡
制斬衰絰杖衣悉粗布羣小來弔盤旋地坐舉手受執蒞膳
積旬不聽音伎左右直長閤豎王寶孫諸人共營羞云爲
天子解菜

隋志侯景卽尊號升圓丘行不能正履有識者知其不免景
尋敗梁元帝旣平侯景破蕭紀而有驕矜之色性又~~不~~狃由
是臣下離貳卽位三年而爲西魏所陷帝竟不得其死

又陳後主每祀郊廟必稱疾不行建寧令莫華上奏諫曰拜
三妃以臨軒祀宗廟而稱疾非祇肅之道後主怒而斬之又

引江總孔範等內宴無復尊卑之序號爲狎客專以詩酒爲
娛不恤國政祕書監傅縡上書諫曰人君者恭事上帝子愛
下人省嗜慾遠邪佞未明求衣日旰忘食是以澤被區宇慶
流子孫陛下頃來酒色過度不虔郊廟大神專媚淫之鬼
小人在側宦豎擅權惡誠直如仇讐視時人如草芥後宮曳
羅綺廐馬餘菽粟百姓流離轉屍蔽野神怒人怨衆叛親離
臣恐東南王氣自斯而盡後主不聽驕恣日甚未幾而國滅
陳司空侯安都自以有安社稷之功驕矜日益每侍宴酒酣
輒箕踞而坐嘗謂文帝曰何如作臨川王時又借華林園水
殿與妻妾賓客置酒於其上帝甚惡之後竟誅死

又東魏武定五年後齊文襄帝時爲世子屬神武帝崩秘不
發喪朝魏帝於鄴魏帝宴之文襄起僂及嗣位又朝魏帝於

鄴侍宴而情有識者知文襄之不免後果爲盜所害神武時
司徒高昂嘗詣相府將直入門門者止之昂怒引弓射門者
神武不之罪尋爲西魏所殺
又後齊後主爲周師所迫至鄴集兵斛律孝卿勸後主親勞
將士宜流涕慷慨以感激之人當自奮孝卿授之以辭後主
然之及對衆嘿無所言因赧然大笑左右皆哂將士怒曰身
尙如此吾輩何急由是皆無戰心俄爲周師所虜
又煬帝自負才學每驕天下之士嘗謂侍臣曰天下當謂朕
承藉餘緒而有四海耶設令朕與士大夫高選亦當
矣謂當世之賢皆所不逮書云謂人莫己若者亡帝自矜已
以輕天下能不亡乎帝又言習吳音其後竟終於江都此亦
魯襄公終於楚宮之類也

厥罰恆雨

齊志貌傳曰失威之制怠慢驕恣謂之狂則不肅矣下不敬則上無威天下既不敬又肆其驕恣肆之則不從

夫不敬其君不從其政則陰氣勝故曰厥罰常雨

宋志文帝元嘉二十一年六月京邑連雨百餘日大水孝武

帝大明元年正月京邑雨水大明五年七月京邑雨水大明

八年八月京邑雨水明帝太始二年六月京邑雨水順帝昇

明三年四月乙亥吳郡桐廬縣暴風雷電揚砂折木水平地

二丈流漂居民

齊志永明八年四月己巳起陰雨晝或暫晴夜時見星月連

雨積霖至十七日乃止十一年四月辛巳朔至三月戊寅止

其間暫時晴從四月一日又陰雨晝或見日夜乍見月回復

陰雨至七月乃止永泰元年十二月二十九日雨至永元元

年五月二十一日乃晴傳曰大雨雪猶庶徵之常雨也然有

甚焉大雨雪者陰之畜積甚也一曰與大水同象陰甚故爲雪耳建元二年閏月己丑雨雪三年十一月雨雪或陰或晦八十餘日至四年二月乃止

隋志梁天監七年七月雨至十月乃霽鴻範五行傳曰陰氣彊積然後生水雨之災時武帝頻年興師是歲又大舉北伐諸軍頗捷而士卒罷弊百姓怨望陰氣畜積之應也

又陳太建十二年八月大雨霪霖

又東魏武定五年秋大雨七十餘日

又後齊河清三年六月庚子大雨晝夜不息至甲辰山東大水人多餓死天統三年十月積陰大雨武平七年七月大霖雨水澇人戶流亡

又後周建德三年七月霖雨三旬

厥極惡時則有服妖

齊志貌傳又曰上失節而狂下怠慢而不敬上下失道輕法侵制不顧君上因以薦饑貌

氣毀故有雞觚一曰水歲雞多死及為怪亦是也上下不相信大臣姦宄民為寇盜故曰厥極惡一曰民多被刑或形貌

醜惡風俗狂慢變節易度則為輕剽奇怪之服故曰時則有服妖昔魏明帝著繡帽被縹紈半袖揚阜諫曰此於禮何法

服邪是時尚書何晏好服婦人之服傳玄曰衣裳之制所以定上下殊內外也大雅云玄衮赤鳥鉤膺鏤錫歌其文也小

雅云有嚴有翼共武之服詠其武也若內外不殊王制失叙服妖既作身隨之亡妹喜冠男子之冠何晏服婦人之服其

咎均也

宋志晉末皆冠小冠而衣裳博大風流相倣輿臺成俗識者

曰此禪代之象也永初以後冠還大云宋文帝元嘉六年民

間婦人結髮者三分髮抽其鬢直向上謂之飛天紒始自東

府流被民庶時司徒彭城王義康居東府其後卒以陵上徙

廢孝武帝世豫州刺史劉德願善御車世祖嘗使之御畫輪

幸太宰江夏王義恭第德願挾牛杖催世祖云日暮宜歸又

求益僦車世祖甚懼此事與漢靈帝西園蓄私錢同也孝武
世幸臣戴法興權亞人主造員頭履世人莫不効之其時員
進之俗大行方格之風盡矣明帝初司徒建安王休仁統軍
赭圻制烏紗帽反抽帽褰民間謂之司徒狀京邑翕然相尙
休仁後果以疑逼致禍

齊志永明中宮內服用射獵錦文爲騎射兵戈之象永明中

蕭湛開博風帽後之裙製爲破後帽永明末民間製倚勸帽

南史以生紗爲帽半其建武中帽帟覆頂東昏時以爲帟應

在下而今在上不祥斷之於是人皆反帟向下

南史帽者首向下天意若曰元永元中東昏侯自造遊宴之服綴以花綵

首方爲猥賤乎錦繡羣小又造四種帽帽因勢爲名一曰山鵲歸林者詩云

鵲巢夫人之德東昏寵嬖淫亂故鵲歸其林藪二曰兔子度

坑天意言天下將有逐兔之事也三曰反縛黃離嚙黃口小鳥也反縛面縛之應也四曰鳳凰度三橋鳳凰者嘉瑞三橋梁王宅處也南史永明中百姓忽著破後帽始自建業流於四遠貴賤翕然服之此服妖也帽自蕭湛之家其流遂寔天意若曰武穆文昭皆當滅而湛亦誅死之效焉又武帝時以燕支爲朱衣朝士皆服之及明帝以宗子入纂此又奪朱之效也又東昏又令左右作逐鹿帽形甚窄狹後果有逐鹿之事東昏宮裏又作散叛髮反髻根向後百姓爭學之及東昏狂惑天下散叛矣東昏又與羣小別立帽騫其口而舒兩翅名曰鳳度三橋幫向後總而結之名曰反縛黃麗東昏與刀敕之徒親自著之皆用金寶鑿以璧璫又作著調帽鏤以金玉間以孔翠此皆天意梁武帝舊宅在三橋而鳳度之名鳳

翔之驗也黃麗者皇離爲日而反縛之東昏戮死之應也調者梁武帝至都而風俗和調先是百姓及朝士皆以方帛填胸名曰假兩此又服妖假非正名也儲兩而假之名不得真也東昏誅其子廢爲庶人假兩之意也

隋志後齊婁后卧疾寢衣無故自舉俄而后崩文宣帝末年衣錦綺傅粉黛數爲胡服微行市里粉黛者婦人之飾陽爲陰事君變爲臣之象也及帝崩太子嗣位被廢爲濟南王又齊氏出自陰山胡服者將反初服錦綵非帝王之法服微服者布衣之事齊亡之效也後主好令宮人以白越布折額狀如鬢幘又爲白蓋此二者喪旤之服也後主果爲周武帝所滅父子同時被害武平時後主於苑內作貧兒村親衣縑縷之服而行乞其間以爲笑樂多令人服烏衣以相執縛後主

果爲周所敗被虜於長安而死妃后窮困至以賣燭爲業北
史齊後主時婦人皆髮別著以假髻而危邪之狀如飛鳥至
於南面則髻心正西始自宮內爲之被於四遠天意若曰元
首翦落危側當走西也

隋志後周大象元年服冕二十有四旒車服旗鼓皆以二十
四爲節侍衛之官服五色雜以紅紫令天下車以大木爲輪
不施輻朝士不得佩綬婦人墨粧黃眉又造下帳如送終之
具令五皇后各居其一實宗廟祭器於前帝親讀版而祭之
又將五輅載婦人身率左右步從又倒懸雞及碎瓦於車上
觀其作聲以爲笑樂皆服妖也帝暴崩而政由於隋周之法
度皆悉改易

又開皇中房陵王勇之在東宮及宜陽公王世積家婦人所

服領巾製同槩幡軍幟婦人爲陰臣象也而服兵幟臣有兵
旣之應矣勇竟遇害世積坐伏誅

時則有龜孽

宋志靈龜者神龜也王者德澤湛清漁獵山川從時則出五
色鮮明三百歲游於藻葉之上三千歲常游於卷耳之上知
存亡明於吉凶禹卑宮室靈龜見玄龜書者天符也王者德
至淵泉則雒出龜書然案宋文帝元嘉十九年四月戊申白
龜見吳興餘杭太守文道恩以獻二十年四月辛卯白龜見
吳興餘杭揚州刺史始興王濬以聞二十四年十月甲午揚
州刺史始興王濬獲白龜以獻孝武帝大明三年三月戊子
毛龜見宣城廣德太守張辨以獻四年六月壬寅車駕幸藉
田白龜見于千畝尙書右僕射劉秀之以獻七年八月乙未

毛龜見新安王子鸞獲以獻明帝泰始二年八月丙辰朔四
眼龜見會稽會稽太守巴陵王休若以獻八月丙寅六眼龜
見東陽長山文如爻卦太守劉勰以獻六年九月己巳八眼
龜見吳興故鄣太守褚淵以獻明帝泰豫元年十月壬戌義
興陽羨縣獲毛龜太守王蘊以獻

按皆物反常則為妖也

南齊志昇明三年太祖為齊王白毛龜見東府城池中建元

二年休安陵獲玄龜一頭永明五年武騎常侍唐潛上青毛

神龜一頭七年六月彭城毘田中獲青毛龜一頭八年延陵

縣前澤畔獲毫龜一枚八年四月長山縣王惠獲六目龜一

頭腹下有萬歡字并有卦兆六月建城縣昌城田獲四目龜

一頭下有萬齊字九年五月長山縣獲神龜一頭腹有下巽

兌卦中興二年正月邏將潘道蓋於山石穴中獲毛龜一頭

魏志世祖神麤三年七月冀州獻白龜傳言王者不私人以
官尊者任舊無偏黨之應則見高宗興安二年六月營州進
大龜高祖延興元年十二月徐州竹邑戍士邢德於彭城南
一百二十里得著一株四十九枚下掘得大龜獻之詔曰龜
著與經文相合所謂靈物也德可賜爵五等三年六月京師
獲大龜肅宗神龜元年二月獲龜於九龍殿靈芝池大赦改
元孝靜武定三年十月有司奏南兗州陳留郡民賈興達於
家庭得毛龜一果與傳言應耶抑龜孽也

隋志開皇中掖庭宮每夜有人來挑宮人宮司以聞帝曰門
衛甚嚴人何從而入當是妖精耳因戒宮人曰若逢但斫之
其後有物如人夜來登牀宮人抽刀斫之若中枯骨其物落
牀而走宮人逐之因入池而沒明日帝令涸池得一龜徑尺

餘其上有刀迹殺之遂絕

時則有雞旤

宋志文帝元嘉十二年華林園雌雞漸化爲雄明帝泰始中

吳興東遷沈法符家雞有四距

魏志鴻範論曰京房傳曰雞小畜猶小臣也角者兵之象在

上君之威也此小臣執事者將秉君之威以生亂不治之害

高祖太和元年夏五月有司奏京師有雌雞二頭上生冠如

角與衆雞異世宗正始元年四月河南有雞雛四足四翼語

在崔光傳八月司州上言河內民席衆家雞雛近尾上復有

一頭口目具二頭皆從頸後各有二翼二足旁行延昌四年

十二月洛州上言魏興太守常矯家黃雌雞頭上肉角大如

棗長寸三分角上生聚毛長半寸肅宗正光元年正月虎賁

中郎將蘭兜家雞雄雌二各頭上生兩角其毛雜色上聳過冠

隋志開皇中有人上書言頻歲已來雞鳴不鼓翅類腋下有物而妨之翮不得舉肘腋之臣當爲變矣書奏不省大業初天下雞多夜鳴

時則有下體生於上之痾

魏志劉歆說貌之不恭是謂不肅上嫚下暴則陰氣盛水傷百穀衣食不足姦宄並作故其極惡也一曰民多被刑貌醜惡也班固以爲六畜謂之旤言其著也及人謂之痾痾病貌言寢深也太宗永興三年民烏蘭喉下生骨狀如羊角長一尺餘高祖太和十六年五月尚書李冲奏定州中山郡毋極縣民李班虎女獻容以去年九月二十日右手大拇指甲下

生毛九莖至十月二十日長一尺二寸肅宗熙平二年十一月并州表送祁縣民韓僧真女令姬從母右脇而生靈太后令付掖庭正光元年五月南兗州下蔡郡有大人跡見行七步跡長一尺八寸廣七寸五分高祖延興三年秋秀容郡婦人一產四男四產十六男莊帝永安三年十一月京師民家妻產男一頭二身四手四脚三耳太和十六年十一月乙亥高祖與沙門道登幸侍中省日入六鼓見一鬼衣黃褶袴當戶欲入帝以爲人叱之而退問諸左右咸言不見唯帝與道登見之顯祖皇興二年十月豫州疫民死十四五萬世宗永平三年四月平陽之禽昌襄陵二縣大疫自正月至是月死者二千七百三十人

隋志齊天保中臨漳有婦人產子二頭共體

又後周保定三年有人產子男陰在背上如尾兩足指如獸

爪

時則有青眚青祥

齊志貌傳又曰危亂端見則天地之異生木者青故曰青眚為惡祥凡貌傷者金沴木木沴金

衝氣相通

齊志延興元年海陵王初立文惠太子冢上有物如人長數

丈青色直上天有聲如雷

魏志莊帝永安三年六月甲子申時辰地有青氣廣四尺東

頭緣山西北引至天半止西北戌地有黑赤黃雲如山峯頭

有青氣廣四尺許東南引至天半二氣相接東南氣前散西

北氣後滅亦帝執崩之徵也

隋志陳禎明二年四月羣鼠無數自蔡州岸入石頭淮至青

塘兩岸數日死隨流出江近青祥也

北史仁壽四年七月日青無光八日乃復

惟金沴木

宋志文帝元嘉十七年劉斌爲吳郡郡堂屋西頭鴟尾無故
落地治之未畢東頭鴟尾復落半正殿謀對東南梁前楹西
魏志太和十九年六月徐州表言丈八銅像汗流於地永安
普泰永熙中京師平等寺定光金像每流汗國有事變時咸
畏異之永安三年二月京師民家有二銅像各長丈餘一頤
下生白毫四一頰旁生黑毛一惠太子塚上青烟吹入吳興
隋志陳天嘉六年秋七月儀賢堂無故自壓近金沴木也時
帝盛修宮室起顯德等五殿稱爲壯麗百姓失業故木失其
性也禎明元年六月宮內水殿若有刀鋸斫伐之聲其殿因
無故而倒七月朱雀航又無故自沉

南史陳後主時采木湘州擬造正寢棧至牛渚磯盡沒水中
既而漁人見棧浮於海上

隋志後齊孝昭帝將誅楊愔乘車向省入東門轆竿無故自
折清河二年長廣郡廳事梁忽剝若人狀太守惡而削去之
明日復然武平七年秋穆后將如晉陽向北宮辭胡太后至
宮內門所乘七寶車無故陷入於地牛沒四足

又後周建德六年青城門無故自崩青者東方色春宮之象
也

又大業中齊王暕於東都起第新構寢室其楸無故而折
次二事曰言言之不從是謂不义厥咎僭

南史齊隆昌元年先是文惠太子立樓館於鍾山下號曰東
田太子屢游幸之東田反語爲顛童也武帝又於青溪立宮

號曰舊宮反之窮廩也果以輕狷而至於窮又武帝時有小
史姓皇名太子武帝曰皇太子非名之謂於是移點於外易
名爲犬子處士何點曰太子者天地之所懸三才之所係今
化爲犬不得立矣旣而文惠太子薨鬱林海陵相繼黜此其
驗也又武帝立禪靈寺於都下當世以爲壯觀天意若曰禪
者禪也靈者神明之目兆帝晏駕而鼎業傾移也永明世市
里小兒以鐵相擊於地謂之鬪鑿鑿之爲言族也至於是宗
室族滅矣又先是人間語好云擾攘至建武時朝士勸進實
爲忽遽倚勸擾攘之言於是驗矣又時人以東昏所圍處爲
長圍及建康見圍亦名長圍先是俗語謂密相欺變者爲和
欺於是梅蟲兒茹法珍等曰今日敗於桓和可謂和欺矣蓋
東昏爲桓和所給出戰因降也

南史天監十三年六月都下訛言有棖棖取人肝肺及血以飴天狗百姓大懼二旬而止

隋志梁武陵王紀僭卽帝位建元曰天正永豐侯蕭撝曰王不克矣昔栢亥年號大亨有識者以爲二月了而亥之敗實在仲春今日天正正之爲文一止其能久乎果一年而敗

南史陳後主名叔寶反語爲少福亦敗徵云又始北齊末諸省宮人多稱省主未幾而滅至是舉朝亦有此稱識者以爲省主主將見省之兆及聞隋軍臨江後主曰王氣在此齊兵三度來周兵再度至無不摧沒虜今來者必自敗孔範亦言無渡江理但奏伎縱酒作詩不輟而至於亡

隋志後齊文宣帝時太子殷當冠詔令邢子才爲制字子才字之曰正道帝曰正一止也吾兒其替乎子才請改帝不許

曰天也因顧謂常山王演曰奪時任汝慎勿殺也及帝崩太子嗣位常山果廢之而自立殷尋見害武成帝時左僕射和士開言於帝曰自古帝王盡爲灰土堯舜桀紂竟亦何異陛下宜及少壯恣意歡樂一日可以當千年無爲自勤約也帝悅其言彌加淫侈士開旣導帝以非道身又擅權竟爲御史中丞所殺武平中陳人寇彭城後主發言憂懼侍中韓長鸞進曰縱失河南猶得爲龜茲國子淮南今沒何足多慮人生幾何時但爲樂不須憂也帝甚悅遂耽荒酒色不以天下爲虞未幾爲周所滅武平七年後主爲周師所敗走至鄴自稱太上皇傳位於太子恆改元隆化時人離合其字曰降死竟降周而死北史文宣改年爲天保士有深識者曰天保之字爲一大人只十帝其不過十乎河清三年六月晉陽訛言有

鬼兵百姓競擊銅鐵以捍之後主盛爲無愁之曲自彈胡琵琶而唱之侍和之者以數百人間謂之無愁天子狗則飼以梁肉馬及鷹犬乃有儀同郡君之號故有赤彪儀同逍遙郡君陵霄郡君高思好書所謂馱龍逍遙者也犬於馬上設褥以抱之鬪雞亦號開府又爲刀子者刃皆狹細名曰盡勢遊童戲者好以兩手持繩拂地而却上跳且唱曰高末高末之言蓋高氏運祚之末也北齊宮中皆呼父爲兄兄嫡母爲家乳母爲姊姊婦爲妹妹皆言不從也

隋志周武帝改元爲宣政梁主蕭歸離合其字爲宇文亡日其年六月帝崩宣帝在東宮時不修法度武帝數撻之及嗣位摸其痕而大罵曰死年晚也又改元爲大象蕭歸又離合其字曰天子豕明年而帝崩又開皇初梁王蕭琮改元爲廣

運江陵父老相謂曰運之爲字軍走也吾君當爲軍所走乎
其後琮朝京師而被拘留不反其叔父巖掠居人以叛梁國
遂廢文帝名皇太子曰勇晉王曰英秦王曰俊蜀王曰秀開
皇初有人上書曰勇者一夫之用又千人之秀爲英萬人之
秀爲俊斯乃布衣之美稱非帝王之嘉名也帝不省時人呼
楊姓多爲羸者或言於上曰楊英反爲羸殃帝聞而不懌遽
改之其後勇俊秀皆被廢黜煬帝嗣位終失天下卒爲楊氏
之殃煬帝卽位號年曰大業識者惡之曰於字離合爲大苦
來宋本作若未
雍本作若者也尋而天下喪亂率土遭塗炭之酷焉煬帝
嘗從容謂秘書郎虞世南曰我性不欲人諫若位望過顯而
來諫我以求當世之名者彌所不耐至於卑賤之士雖少寬
假然卒不置之善地汝其知之時議者以爲古先哲王之馭

天下也明四目達四聰懸敢諫之鼓立書諉之木以開言者
之路猶恐忠言之不至由是澤敷四海慶流子孫而帝惡直
言讎諫士其能久乎竟逢殺逆

厥罰恆暘

齊志言傳曰言易之道西方曰兌爲口人君過差無度
刑法不一斂從其重或有師旅炕陽之節若動衆勞民
是言不從人君既失衆政令不從孤陽持治下畏
君之重刑陽氣勝則旱象至故曰厥罰常陽也

宋志文帝元嘉二年夏旱四年秋京都旱八年五月揚州諸
郡旱十九年二十年南兗豫州旱二十七年八月不雨至二
十八年三月時索虜南寇孝武帝大明七年八年東諸郡大
旱民飢死者十六七後廢帝元徽元年八月京都旱
齊志建元三年大旱永明三年大旱建武二年大旱

隋志梁天監元年大旱米斗五千人多餓死鴻範五行傳曰
若持亢陽之節興師動衆勞人過度以起城邑不顧百姓臣

下悲怨然天心不能從故陽氣盛而失度陰氣沉而不附陽氣盛旱災應也

又陳太建十二年春不雨至四月

又東魏天平四年并肆汾建晉絳秦陝等諸州大旱人多流散武定二年冬春旱

又後齊天保九年夏大旱乾明元年春旱河清二年四月并晉已西五州旱後主天統二年春旱

又開皇四年已後京師頻旱大業四年燕代緣邊諸郡旱八年天下旱百姓流亡十三年天下大旱

厥極憂時則有詩妖

齊志言傳曰下既悲苦君上之行又畏嚴刑而不敢正言則必先發於歌謠歌謠曰事也

口氣逆則惡言或有怪謠焉

南齊志老子河洛讖曰年秣七七水滅緒風雲俱起龍麟舉

宋水德王義熙十四年元熙二年永初三年景平一年元嘉
三十年孝建三年大明八年永光一年泰始七年泰豫元年
元徽四年昇明三年凡七十七年故曰七七也易曰雲從龍
風從虎關尹云龍不知其乘風雲而上天也讖又曰肅草成
道德懷書備出身形法治吳出南京上卽齊主姓諱也南京
南徐州治京口也讖又曰墮塌河梁塞龍淵消除水災泄山
川墮塌河梁爲路也路卽道也淵塞者譬路成也卽太祖諱
也消水災言除宋氏患難也讖又曰上參南斗第一星下立
草屋爲紫庭神龍之岡梧桐生鳳鳥舒翼翔且鳴南斗第一
星吳分也草屋肅字也又肅管之器像鳳鳥翼也讖又曰肅
爲二士天下大樂二士主字也讖又曰天子何在草中宿宿
肅也尙書中候儀明篇曰仁人傑出握表之象曰角姓合音

之于蘇侖云蕭角姓也又八音之器有簫管也史臣曰案晉
光祿大夫何禎解音之于爲曹字謂魏氏也王隱晉書云卯
金音于亦爲魏也侯書章句本無銓序二家所稱既有前釋
未詳侖言爲何推據孝經鉤命決曰誰者起視名將君者羣
也理物爲雄優劣相次以期興將太祖小諱也征西將軍蕭
思話見之曰此我家諱也王子年歌曰金刀治世後遂若帝
王昏亂天神怒災異屢見戒人主三分二叛失州土三王九
江一在吳餘悉稚小早少孤一國二主天所驅金刀劉也三
分二叛宋明帝世也三王九江者孝武於九江興晉安王子
勛雖不終亦稱大號後世祖又於九江基霸迹此三王也一
在吳謂齊氏桑梓亦寄治南吳也一國二主謂太祖符運潛
興爲宋氏驅除寇難歌又曰二禾摻摻林茂孳金刀利刃齊

刈之刈剪也詩云實始剪商

南史金刀劉字歌

又曰欲知其姓草蕭

肅穀中最細低頭熟鱗身甲體永興福穀道熟成又諱也大
祖體有龍鱗斑駁成文始謂是黑厯治之甚至而文愈明伏
義亦鱗身也郭文舉金雄記曰鑠金作刀在龍里占睡上人
相須起又云當復有作肅人草蕭字也易云聖人作之記又
云草門可憐乃當悴建號不成易運沸詩云不時時也不成
成也建號建元號也易運革命也讖曰周文王受命于五百
歲河雒出聖人受命於己未至丙子爲十八周旅布六郡東
南隅四國安定可久留案周滅殷後七百八十年秦四十九
年漢四百二十五年魏四十五年晉百五十年宋六十年至
建元元年千五百九年也武進縣彭山舊瑩在焉其山岡阜
相屬數百里有五色雲氣有龍出焉宋明帝惡之遣相墓

工高靈文占視靈文先與世祖善還詭答云不過方伯退謂
世祖曰貴不可言帝意不已遣人於墓左右校獵以大鐵釘
長五六尺釘墓四維以爲厭勝太祖後改樹表柱柱忽龍鳴
響震山谷父老咸志之云又宋秦始中童謠云東城出天子
故明帝殺建安王休仁蘇侃云後順宋本諱作從下做此帝自東城卽
位論者謂應之乃是武進縣上所居東城里也熊襄云上舊
鄉有大道相傳云秦始皇所經呼爲天子路後遂爲帝鄉焉
案順帝實當援立猶如晉之懷愍亦有徵符齊運旣興巡幸
路名或是秦舊疑不能詳又宋秦始旣失彭城江南始傳種
消梨先時所無百姓爭欲種植識者曰當有姓蕭而來者十
餘年齊受禪元徽中童謠曰襄陽白銅蹄郎殺荊州兒後沈
攸之反雍州刺史張敬兒襲江陵殺沈攸之子元琰等永明

元年元日有小人發白虎樽既醉與筆札不知所道直云憶高帝敕原其罪世祖起青溪舊宮時人反之曰舊宮者窮廐也及上崩後宮人出居之永明初百姓歌曰白馬向城啼欲得城邊草後句閒云陶郎來白者金色馬者兵事三年妖賊唐寓之起言唐來勞也世祖起禪靈寺初成百姓縱觀或曰禪者授也靈非美名所授必不得其人後太孫立見廢也永明中宮內坐起御食之外皆爲客食世祖以客非家人名改呼爲別食文惠太子在東宮作兩頭纖纖詩後句云磊磊落落玉山崩文惠太子作七言詩後句輒云愁和諦後果有和帝禪位永明中虜中童謠云黑水流北赤火入齊尋而京師人家忽生火赤於常火熱小微貴賤取以治病法以此火灸桃枝七炷七日皆差敕禁之不能斷京師有病瘦者以灸數

日而差鄰人笑曰病偶自差豈火能爲此人便覺頤間癢明日癢還如故後梁以火德興文惠太子起東田時人反云後必有顛童果由太孫失位齊宋以來民間語云擾攘建武上明帝初誅害蕃戚京師危駭永元元年童謠曰洋洋千里流流翼東城頭烏馬烏皮袴三更相告訴脚跛不得起殺老姥子千里流者江祏也東城遙光也遙光夜舉事垣厯生者烏皮袴褶奔往之跛脚亦遙光老姥子孝子之象徐孝嗣也永元中童謠云野猪雖嗥嗥馬子空閭渠不知龍與虎飲食江南墟七九六十三廣莫人無餘烏集傳舍頭今汝得寬休但看三八後摧折景陽樓識者解云陳顯達屬猪崔慧景屬馬非也東昏侯屬猪馬子未詳梁王屬龍蕭穎胄屬虎崔慧景攻臺城頓兵廣莫死時年六十三烏集傳舍卽所謂瞻烏爰

止于誰之屋三八二十四起建元元年至中興二年二十四
年也摧折景陽樓亦高臺傾之之意也言天下將去乃得休
息也齊宋之際民間語云和起言以和顏而爲變起也後和
帝立崔慧景圍臺城有一五色幡飛翔在雲中半日乃不見
衆皆驚怪相謂曰幡者事尋當翻覆也數日而慧景敗南史
百姓歌云闕武堂種楊柳至尊屠肉潘妃酤酒大同之季公
隋志梁天監三年六月八日武帝講於重雲殿沙門誌公忽
然起舞歌樂須臾悲泣因賦五言詩曰樂哉三十餘悲哉五
十裏但看八十三子地妖災起佞臣作欺妄賊臣滅君子若
不信吾語龍時候賊起且至馬中間銜悲不見喜梁自天監
至於大同三十餘年江表無事至太清二年臺城陷帝享國
四十八年所言五十裏也太清元年八月十三而侯景自懸

瓠來降在丹陽之北子地帝惑朱异之言以納景景之作亂始自戊辰之歲至午年帝憂崩十年四月八日誌公於大會中又作詩曰兀尾狗子始著狂欲死不死齧人傷須臾之間自滅亡患在汝陰死三湘橫尸一旦無人藏侯景小字狗子初自懸瓠來降懸瓠則古之汝南也巴陵南有地名三湘卽景奔敗之所天監中茅山隱士陶弘景爲五言詩曰夷甫任散誕平叔坐談空不憶昭陽殿忽作單于宮及大同之季公卿唯以談玄爲務夷甫平叔朝賢也侯景作亂遂居昭陽殿大同中童謠曰青絲白馬壽陽來其後景侯破丹陽乘白馬以青絲爲羈勒南始史始監中沙門釋寶誌爲詩曰昔年三十八今年八十三四中復有四城北火酣酣帝使周捨封記之及中大同元年同泰寺災帝啟封見捨手迹爲之流涕帝

生於甲辰三十八尅建業之年也遇災歲實丙寅八十三矣
四月十四日而起火之始自浮屠第三層三者帝之昆季次
也帝惡之召太史令虞履筮之遇災履曰無害其繇云西南
得朋東北喪朋安貞吉文言云東北喪朋乃終有慶帝曰斯
魔鬼也西應見卯金來尅木卯爲陰賊鬼而帶賊非魔何也
孰爲致之西爲口舌當乎兌位說言乎兌故知善言之口宜
爲前戒

隋志陳初有童謠曰黃斑青驄馬發自壽陽涘來時冬氣未
去日春風始其後陳主果爲韓擒所敗擒本名擒虎黃班之
謂也破建康之始復乘青驄馬往反時節皆相應陳時江南
盛歌王獻之桃葉之詞曰桃葉復桃葉渡江不用楫但渡無
所苦我自迎接汝晉王伐陳之始置營桃葉山下及韓擒渡

江大將任蠻奴至新林以導北軍之應陳後主造齊雲觀國
人歌之曰齊雲觀寇來無際畔功未畢而爲隋師所虜禎明
初後主作新歌詞甚哀怨令後宮美人習而歌之其詞曰玉
樹後庭花花開不復久時人以歌讖此其不久兆也南史柳
達摩謂其衆曰頃在北童謠云石頭擣兩襠擣青復擣黃侯
景服青已倒於此今吾徒衣黃豈謠言驗耶後主在東宮有
婦人突入唱曰畢國主皆亡徵也

隋志齊神武始移都於鄴時有童謠云可憐青雀子飛入鄴
城裏作窠猶未成舉頭失鄉里寄書與婦母好看新婦子魏
孝靜帝者清河王之子也后則神武之女鄴都宮室未備卽
逢禪代作窠未成之效也孝靜尋崩文宣以后爲太原長公
主降於楊愔時婁后尙在故言寄書與婦母新婦子斥后也

武定中有童謠云百尺高竿摧折水底燃燈澄滅高者齊姓也澄文襄名五年神武崩摧折之應七年文襄遇盜所害澄滅之徵也天保中陸灋和入國書其屋壁曰十年天子爲尙可百日天子急如火周年天子迭代坐時文宣帝享國十年而崩廢帝嗣立百餘日用替厥位孝昭卽位一年而崩此其效也武平元年童謠曰狐截尾你欲除我我除你其年四月隴東王胡長仁謀遣刺客殺和士開事露反爲士開所譖死二年童謠曰和士開七月三十日將你向南臺小兒唱訖一時拍手云殺却至七月二十五日御史中丞琅邪王儼執士開送於南臺而斬之是歲又有童謠曰七月刈禾傷早九月喫餒正好十月洗蕩飯瓮十一月去却趙老七月士開被誅九月琅邪王遇害十一月趙彥深出爲西兗州刺史武平末

童謠曰黃花勢欲落清樽但滿酌時穆后母子淫僻干預朝政時人患之穆后小字黃花後字舍利尋逢齊亡欲落之應也鄴中又有童謠曰金作掃帚玉作把淨掃殿屋迎西家未幾周師入鄴北史時訛言上黨出聖人帝聞之將徙一郡而郡人張思進上言殿下生於南宮坊名上黨卽是上黨出聖人帝悅而止先是童謠曰一束藁兩頭然河邊殺獼飛上天藁然兩頭於文爲高河邊殺獼爲水邊羊指帝名也又讖云羊飲盟津角拄天盟津水也羊飲水王名也角拄天大位也又陽平郡界回星驛傍有大水土人常見羣羊數百立卧其中就視不見事與讖合願王勿疑帝以問高德正德正又贊成之於是始決乃使李密卜之遇大橫曰大吉漢文帝之封也帝乃鑄象以下之一寫而成又謠云馬子入石室三千六

百日帝以午年生故曰馬子三臺石季龍舊居故曰石室三千六百日十年也又帝曾問太山道士曰吾得幾年爲天子答曰得三十年道士出後帝謂李后曰十年十月十日得非三十也吾甚畏之

北齊書文襄紀文襄將殂崔季舒忽於北宮門外諸貴前誦鮑明遠詩曰將軍旣下世部曲亦罕存聲淚淒斷北齊上洛王思宗傳先是童謠曰中興寺內白鳧翁四方側聽聲雍雍道人聞之夜打鐘時丞相府在北城中卽舊中興寺也鳧翁謂雄雞蓋指武城小字步落稽也道人濟南王小名打鍾言將被擊也旣而太史奏言北城有天子氣昭帝以爲濟南應之乃使平秦王歸彥之鄴迎濟南赴并州殺之又斛律光傳周將軍韋孝寬忌光英勇乃作謠言令間諜漏其文於鄴曰

百升飛上天明月照長安又曰高山不推自崩榭樹不扶自
豎祖珽因續之曰盲眼老公背上下大斧饒舌老母不得語
令小兒歌之於路提婆聞之以告其母令萱萱以饒舌斥已
也盲老公謂珽也遂相與協謀以謠言啟帝曰斛律累世大
將明月聲震關西豐樂威行突厥女爲皇后男尙公主謠言
甚可畏也

隋志周初有童謠曰白楊樹頭金雞鳴祇有阿舅無外甥靜
帝隋氏之甥旣遜位而崩諸舅強盛周宣帝與宮人夜中連
臂蹋蹄而歌曰自知身命促把燭夜行遊帝卽位三年而崩
北史始宣武孝武民間謠曰狐非狐貉非貉焦梨狗子齧斷
索識者以爲索謂周本索髮焦梨狗子指宇文泰俗謂之黑
獺也

隋志開皇十年高祖幸并州宴秦孝王及王子相帝爲四言
詩曰紅顏距幾玉貌須臾一朝花落白髮難除明年後歲誰
有誰無明年而子相卒十八年而秦孝王薨大業十一年煬
帝自京師如東都至長樂宮飲酒大醉因賦五言詩其卒章
曰徒有歸飛心無復因風力令美人再三吟咏帝泣下霑襟
侍御者莫不歔歔帝因幸江都復作五言詩曰求歸不得去
眞成遭箇春鳥聲爭勸酒梅花笑殺人帝以三月被弑卽遭
春之應也是年盜賊蜂起道路隔絕帝懼遂無還心帝復夢
二豎子歌曰佳亦死去亦死未若乘船度江水由是築居丹
陽將居焉功未就而帝被弑大業中童謡曰桃李子鴻鵠遠
陽山宛轉花林裏莫浪語誰道許其後李密坐楊玄感之逆
爲吏所拘在路逃叛潛結羣盜自陽城山而來襲破洛口倉

後復屯兵苑內莫浪語密也宇文化及自號許國尋亦破滅
誰道許者蓋驚疑之辭也

時則有毛蟲之孽

毛原本作介

宋志宋文帝元嘉二十四年二月雍州送六足麀刺史武陵
王表爲祥瑞此毛蟲之孽也宋順帝昇明元年象三頭度蔡
州暴稻穀及原野又案宋文帝元嘉元年十二月丙辰白象
見零陵洮陽六年三月丁亥白象見安成安復江州刺史南
譙王義宣以聞又二十二年十二月白熊見新安歙縣太守
劉元度以獻又元嘉九年正月白鹿見南譙縣豫州刺史
長沙王義欣以獻十四年白鹿見文鄉十七年五月甲午白
鹿見南汝陰宋縣太守文道恩以獻二十年八月白鹿見譙
郡蘄縣太守鄧琬以獻二十二年二月白鹿見建康縣揚州

刺史始興王濬以聞二月辛未白鹿見南康瀨縣南康相劉
興祖以獻二十三年二月戊戌白鹿見交州交州刺史檀和
之以獻六月丙辰白鹿見彭城彭城縣征北將軍衡陽王義
季獲以獻二十七年二月壬辰朔白鹿見濟陰徐州刺史武
陵王駿以聞二十九年八月癸酉白鹿見鄱陽南中郎將武
陵王駿以獻三十年十一月壬午白鹿見南琅邪南琅邪太
守王僧虔以獻十一月癸酉白鹿見武建郡雒州刺史朱脩
之以獻孝武帝孝建三年三月庚子白鹿見臨川西豐縣孝
武帝大明元年四月甲申白鹿見南平二年四月己丑白鹿
見桂陽郴縣湘州刺史山陽王休祐以獻三年正月癸巳白
鹿見南琅邪江乘南徐州刺史劉延孫以獻三月辛卯白鹿
見廣陵新市太守柳光宗以聞五年五月丙寅白鹿見南東

海丹徒南徐州刺史劉延孫以獻八年六月甲子白鹿見衡陽郡湘州刺史江夏王世子伯禽以獻明帝泰始二年二月乙亥白鹿見宣城宣城太守劉韞以聞五年二月己亥白鹿見長沙湘州刺史劉韞以獻六年十二月乙未白鹿見梁州刺史杜幼文以聞後廢帝元徽三年二月甲子白鹿見鬱洲青冀二州刺史西海太守劉善明以獻又宋少帝景平元年五月癸未白麀見義興陽羨太守王準之獲以獻二年六月白麀見南郡江陽太守王華獻之太祖太祖時入奉大統以爲休祥文帝元嘉五年四月乙巳白麀見汝南武津太守鄭據獲以獻十二年正月白麀見東萊黃縣青冀州刺史王方回以獻十九年五月山陽張休宗獲白麀南兖州刺史臨川王義慶以獻二十年八月白麀見江夏安陸內史劉思

考以獻二十五年二月己丑白驥見淮南太守王休獲以獻
四月戊午白驥見南琅邪太守王遠獲以獻五月辛未朔華
林園白驥生二子皆白園丞梅道念以聞二十六年五月丙
戌白驥見馬頭豫州刺史南平王鑠以獻二十七年正月己
丑白驥見濟陽徐州刺史武陵王駿以聞四月癸丑華林園
白驥生一白子園丞梅道念以聞二十九年六月壬戌白驥
見晉陵暨陽南徐州刺史始興王濬以獻孝武帝孝建三年
六月癸巳白驥見廣陵南兖州以獻孝武帝大明元年七月
丁丑白驥見東萊曲城縣獲以獻二年正月壬戌白驥見山
陽山陽內史程天祚以獻二月辛丑白驥見濟北濟北太守
殷孝祖以獻六年四月戊辰白驥見滎陽湘州刺史建安王
休仁以獻七年正月庚寅白驥見南陽荊州刺史臨海王子

項以獻六月己巳白驪見武陵臨沅太守劉衍以獻九月癸
未白驪見南陽雒州刺史劉秀之以獻明帝泰始三年五月
癸酉白驪見南東海丹徒南徐州刺史桂陽王休範以獻五
月己卯白驪見北海都昌青州刺史沈文秀以獻五年正月
癸卯白驪見汝陰樓煩豫州刺史劉劭以獻明帝泰豫元年
十月壬戌白驪見義興國山太守王蘊以獻後廢帝元徽元
年正月甲午白驪見海陵寧海寧海太守孫嗣之以獻文帝
元嘉二十三年五月甲寅東宮隊白從陳超獲黑驪於肥如
縣皇太子以獻十月辛巳東宮將魏榮獲青驪於秣陵十年
十二月營城縣民成公會之於廣陵高郵界獲白驪麋以獻
孝武帝大明元年二月己亥白鹿見會稽諸暨縣獲以獻又
宋文帝元嘉六年九月長廣昌陽濱于邇獲白兔青州刺史

蕭思話以獻八年閏六月丁亥司徒府白從伊生於淮南繁
昌獲白兔以獻十三年七月甲戌濟南朝陽王道獲白兔青
州刺史段宏以獻十四年正月丙申白兔見山陽縣山陽太
守劉懷之以獻十五年七月壬申山陽師齊獲白兔南兗州
刺史江夏王義恭以獻二十二年三月白兔見東萊當利青
州刺史杜冀以閏二十四年七月丁巳白兔見兗州刺史徐
瓊以閏七月己酉白兔見東莞太守趙球以獻二十七年二
月壬辰白兔見竟陵荊州刺史南譙王義宣以獻六月丙午
白兔見南汝陰豫州刺史南平王鑠以獻孝武帝孝建二年
正月庚戌白兔見淮南太守申坦以閏三年閏二月乙丑白
兔見平原獲以獻孝武大明元年六月庚子白兔見卽墨獲
以獻六年六月乙丑白兔見青冀二州刺史劉道隆以獻八

月辛未白兔見北海青冀二州刺史劉道隆以獻宋明帝泰

始三年二月壬寅白鼠見樂安青州刺史沈文秀以獻南史

元嘉二十八年八月猛獸入郭內為災按舊史以為符瑞故詳載其文而誣罔自

見

齊志京房易傳曰野獸入邑其邑大虛又曰野獸無故入邑

朝廷門及宮府中者邑逆且虛永明中南海王子罕為南兗

州刺史有麋入廣陵城投井而死又有象至廣陵是後刺史

安陸王子敬於鎮被害建武四年春當郊治圓丘宿設已畢

夜虎攫傷人建武中有鹿入景皇寢廟又泰始末武進舊

塋有獸見一角羊頭龍翼馬足父老咸見莫之識也永明十

年鄱陽郡獻一角獸麟首鹿形龍鸞共色瑞應圖云天子萬

福允集則一角獸至十一年白象九頭見武昌史臣日記云

升中子天麟鳳至而龜龍格則鳳凰巢乎阿閣麒麟在乎郊
藪豈非馴之在庭擾以成畜其爲瑞也如此今觀魏晉已來
世稱靈物不少而亂多治少史不絕書故知來儀在沼遠非
前事見而不至未辨其爲祥也昇明三年三月白虎見歷陽
亢縣新昌村新昌村嘉名也瑞應圖云王者不暴白虎至建
元四年三月白虎見安蠻虔化縣中興二年二月白虎見東
平壽張安樂村昇明二年騶虞見安東縣五界山獅子頭虎
身龍脚詩傳云騶虞獸白虎黑文不食生物至德則出又建
元二年江陵縣獲白鼠一頭永明六年白鼠見芳林園十年
九月義陽郡獲白鼠一頭永明四年丹陽縣獲白兔一頭五
年望蔡縣獲白鹿一頭九年臨湘獲白鹿一頭六年蒲儔縣
亮野村獲白驪一頭七年荊州獲白驪一頭八年餘干縣獲

白麀一頭九年義陽安昌縣獲白麀一頭十年司州清激戍
獲白麀一頭十一年廣陵海陵縣獲白麀一頭

隋志梁武帝中大同元年邵陵王綸在南徐州臥內方晝有
狸鬪於欄上墮而獲之太清中遇侯景之亂將兵援臺城至
鍾山有蝥熊無何至齧綸所乘馬毛蟲之孽也中大同中每
夜狐鳴闕下數年乃止京房易飛候曰野獸羣鳴邑中且空
虛南史天監六年三月有三象入建業承聖元年宣城郡猛
獸暴食人

又陳禎明初狐入牀下捕之不獲以爲妖自賣於佛寺爲奴
以禳之京房易飛候曰狐入君室室不居未幾而國滅南史
禎明二年四月戊申有羣鼠無數自蔡洲岸入石頭淮至於
清塘兩岸數日死隨流入江

魏志毛蟲之孽謂變常而爲異也太祖登國中河南有虎七
臥於河側三月乃去後一年蚍蜉白鹿盡渡河北後一年河
水赤如血孝靜元象元年正月有狼入城至碓石曹關獲之
武定五年十二月北城銅爵臺上獲豹一高祖太和元年五
月辛亥有狐魅截人髮肅宗熙平二年自春京師有狐魅截
人髮人相驚恐按瑞應圖外鎮王公刺史二千石令長酷暴
百姓人民怨嗟則白鼠至太宗永興三年二月京師民趙溫
家有白鼠以獻三年春於北苑獲白鼠一尋死割之腹中有
三子皆白四年三月上幸西宮獲白鼠一八月御府民張安
獲白鼠一神瑞二年五月帝獵於檻嶮山獲白鼠一平城獲
白鼠三六月平城獲白鼠二八月豫章王夔獲白鼠一泰常
元年十二月京師民獲白鼯一以獻二年六月中山獲白鼠

二三年三月京師獲白鼠十一月京師獲白鼠一世祖始
光三年八月相州魏郡獲白鼠太延元年八月鴈門獻白鼠
高祖太和二十三年八月京師獲白鼠世宗景明四年五月
京師獲白鼠正始元年六月京師獲白鼠肅宗熙平元年四
月肆州表送白鼠又魏氏世居幽朔至獻帝世有神人言應
南遷於是傳位於子聖武帝命其南徙於山谷阻絕仍欲止
焉復有神獸其形似馬其聲類牛先行導引積年乃出始居
匈奴之故地高祖延興元年十一月肆州秀容民獲麟以獻
王者不刳胎剖卵則至者也天平四年八月有巨象至於南
兗州碭郡民陳天愛以告送京師大赦改年王者自養有節
則至者也高祖太和二年十一月徐州獻黑狐周成王時治
致太平而黑狐見者也三年五月獲白狐王者仁智則至者

也六月撫冥獲白狐以獻八年六月徐州獲黑狐以獻十年
三月冀州獲九尾狐以獻王者六合一統則至者也周文王
時東夷歸之曰王者不傾於色則至德至鳥獸亦至十一年
十一月冀州獲九尾狐以獻二十三年正月司州河州各獻
白狐十九年六月司州平陽郡獲白狐以獻世宗景明三年
二月河州獻白狐永明三年十月白狐見於汲郡延昌四年
四月兗州獻白狐九月相州獻白狐閏月汾州獻白狐二肅
宗正光二年三月南青州獻白狐二三年六月平陽郡獻白
狐八月光州獻九尾狐五年五月平陽郡獻白狐孝靜天平
四年四月西兗州獻白狐七月光州獻九尾狐元象元年四
月光州獻九尾狐二年二月光州獻九尾狐興和三年五月
司州獻九尾狐十二月魏郡獻白狐四年四月瀛州獻白狐

二武定元年七月幽州獲白狐二牡一牝一九月西兗州獻
白狐太和二年十一月辛未秦州獻五色狗三年三月齊州
獻五色狗其五色如畫太祖天興四年五月魏郡斥邱縣獲
白鹿王者惠及下則至太宗永興四年九月建興郡獻白鹿
神麋元年二月定州獲白麋白麋鹿又見於樂陵因以政元
三年二月白鹿見於代郡倒刺山太延四年十二月相州獻
白鹿真君八年五月洛州送白鹿高宗太安二年十月白鹿
見於京師西苑高祖承明元年六月秦州獻白鹿太和元年
正月白鹿見於秦州三月白鹿見於青州四年正月南豫州
獻白鹿十九年七月司州獲白鹿廢以獻二十年六月司州
獻白鹿世宗景明元年四月荊州獻白鹿永平四年八月平
州獻白鹿延昌二年五月齊州獻白鹿四年六月司州獻白

鹿肅宗熙平元年五月濟州獻白鹿二年五月司州獻白鹿
神龜二年六月徐州獻白鹿孝靜元象元年六月齊獻武王
獲白鹿以獻武定元年六月兗州獻白鹿太祖登國六年十
二月上獵親獲鹿一角召問羣臣皆曰鹿當二角今一是諸
國將并之應也高祖太和三年三月肆州獻一角鹿神龜元
年七月徐州獻一角鹿世宗正始二年九月後軍將軍尒朱新
興獻一角獸天下平一則至肅宗熙平元年十一月肆州獻
一角獸神龜二年九月徐州獻一角獸高宗太安三年三月
有狼一見於太平郡議者曰古今瑞應多矣然白狼見於成
湯之世故殷道用興太平嘉名也又先帝本封之國而白狼
見焉無窮之徵也周宣王得之而犬戎服太宗永興四年十
二月章安子封懿獻白麀王者刑罰理則至高祖太和三年

十二月懷州獻白麀三年五月白麀見於豫州二十三年正月華州獻白麀肅宗熙平二年三月徐州獻白麀神龜二年七月徐州獻白麀孝靜武定七年七月瀛州獻白麀又太祖天興二年七月并州獻白兔一王者敬耆老則見三年五月車駕東巡幸廣寧有白兔見於乘輿前獲之四年正月并州獻白兔太宗永興三年上獵於西山獲白兔八月京師獲白兔泰常元年十一月定州安平縣獲白兔二年六月京師獲白兔三年六月頓邱郡獲白兔世祖始光三年五月洛州獻黑兔神麀元年九月章武郡獻白兔四年二月渤海郡獻白兔眞君七年二月青州獻白兔二高宗和平三年十月雲中獲白兔四年閏月鄴縣獲白兔高祖延興五年四月白兔見於代郡承明元年八月白兔見於雲中太和元年六月雍州

周城縣獻白兔三年三月吐京鎮獻白兔八年六月徐州獻
白兔十八年十月瀛州獻白兔二十年七月汲郡獻黑兔七
月京師獲白兔二十三年獲黑兔世宗景明元年十一月河
州獻白兔三年四月潁州郡獻白兔八月河內郡獻白兔四
年六月河內郡獻白兔七月夏州獻黑兔正始元年三月河
南郡獻黑兔四月魯陽郡獻白兔二年八月東郡獻白兔九
月河內郡獻黑兔是月肆州獻白兔東郡又獻白兔三年七
月薄骨律鎮獻白兔九月肆州獻白兔四年四月河內郡獻
白兔永平元年四月濟州獻白兔五月河內獻黑兔十月樂
安郡獲白兔二年二月相州獻白兔延昌三年七月豫州獻
白兔四年三月河南獻白兔八月河南又獻白兔九月河內
又獻白兔肅宗熙平二年四月豫州獻白兔五月東郡獻白

兔六月京師獲白兔十一月鄴善鎮獻白兔神龜元年六月
京師獲黑兔二年八月正平郡獻白兔九月正平郡又獻白
兔十月京師獲黑兔正光元年正月徐州獻白兔五月冀州
獻白兔三年五月徐州獻白兔二是月冀州獻白兔孝靜天
平二年八月光州獻白兔四年十月光州獻白兔元象元年
五月徐州獲白兔六月齊獻武王獲白兔以獻是月濮陽郡
獻白兔興和二年四月徐州獻白兔六月京師獲白兔四年
正月光州獻白兔武定元年三月瀛州獻白兔又汲郡獻白
兔六年十一月武平鎮獻白兔

隋志東魏武定三年九月豹入鄴城南門格殺之五年八月
豹又上銅爵臺

又後齊武平二年春死自廟社之中武平末并肆諸州多狼

而食人洪範五行傳曰狼貪暴之獸大體以白色爲主兵之象也又似犬近犬旤也京房易傳曰君將無道害將及人去之深山以全身厥妖狼食人武平中朔州府門外無何有小兒腳跡又擁土爲城雉之狀時人恠而察之乃狐媚所爲漸流至并鄴

時則有犬旤

宋志武帝永初二年京邑有狗人言文帝元嘉二十九年吳興東遷孟慧度婢蠻與狗通好如夫妻彌年孝武孝建初顏竣爲左衛於省內聞犬子聲在地中掘焉得烏犬子養久之後自死明帝初晉安王子勛稱僞號於尋陽柴桑有狗與女人交三日不分離明帝泰始中秣陵張僧護家犬生豕子隋志後齊天保四年鄴中及頓邱並有犬與子女交洪範五

行傳曰異類不當交而交諄亂之氣後主時犬爲開府儀同
雌者有夫人郡君之號給兵以奉養食以梁肉藉以茵蓐天
奪其心爵加於犬近犬旤也天意若曰卿士皆類犬
又後周保定三年有犬生子腰已後分爲兩身二尾六足犬
猛畜而有爪牙將士之象也

又大業元年鴈門百姓間犬多去其主羣聚於野形頓變如
狼而噉噬行人數年而止五行傳曰犬守禦者也而今去其
主臣下不附之象形變如狼狼色白爲主兵之應也

時則有口舌之病

隋志陳後主爲太子時有婦人突入東宮而大言曰畢國主
至德三年八月建康人家婢死埋之九日而更生有牧牛人
聞而出之禎明二年有船下忽聞人言曰明年亂視之得死

嬰兒長二尺而無頭明年陳滅

又周武帝時有強練者佯狂持一瓠至晉蕩公護門而擊破之曰身尚可子苦矣

時則有白青白祥

齊志言傳曰言氣傷則民多口舌故有口舌之痢金者白故有白青若有白為惡祥

宋志明帝泰始二年五月甲寅赭中獲石栢長三尺二寸廣

三尺五寸揚州刺史建安王休仁以獻三年十一月乙卯盱

眙獲石栢寧朔將軍段榮以獻又文帝元嘉中徐湛之為丹

楊尹夜西門內有氣如練西南指長數十丈又白光覆屋良

久而轉駛乃消此白祥也前廢帝景和元年鄧琬在尋陽種

紫花皆白白青也

南齊志宋昇平二年颯風起建康縣南塘里吹帛一匹入雲

風止下御路紀僧真啟太祖當宋氏禪者其有匹夫居之

隋志梁大同二年地生白毛長二尺近白祥也孫盛以爲勞人之異

又齊河清元年九月滄州及長城之下地多生毛或白或黑長四五寸近白祥也又天統初岱山封禪壇玉璧自出近白祥也岱山王者易姓告代之所玉璧所用幣而自出將有易姓者用幣之象武平三年白水巖下青石璧傍有文曰齊亡走人改之爲上延後主以爲嘉瑞百寮舉賀北史河清四年殿上石自起兩兩相對

又開皇六年七月京師雨毛如髮尾長者三尺餘短者六七寸又開皇十七年石隕於武安滏陽間十餘開皇末高祖於宮中埋二小石於地以誌置牀之所未幾變爲玉劉向曰王者至貴也賤將爲貴之象大業十三年西平郡有石文曰天

子立千年百寮稱賀有識者尤之曰千年萬歲者身後之意也今稱立千年者禍在非遠明年而帝被殺

隋書煬帝紀大業十三年有石自江浮入於揚子

維木沴金

隋志梁大同十二年曲阿建陵隧口石麒麟動木沴金也動者遷移之象天戒若曰園陵無主石麟將爲人所徙也後竟國亡又正月送辟邪二千建陵左雙角者至陵所右獨角者將引於車上振躍者三車兩轅俱折因換車未至陵二里又躍者三每六振則車側人莫不聳奮去地三四尺車輪陷入土三寸木沴金也

又東魏武定四年冬天雨木冰洪範五行傳曰陰之盛而凝滯也木者少陽貴臣象也將有害則陰氣脅木木先寒故得

雨而冰襲之木冰一名介介者兵之象也

又後齊天保二年雨木冰三日武平元年冬雨木冰明年二月又木冰六年七年頻歲春冬木冰河清四年殿上石自起者左右親人離叛之應

又周建德元年濮陽郡有石像郡官令載向府將刮取金在道自躍投地如此者再乃以大繩縛著車壁又絕繩而下

次三事曰視視之不明是謂不慙厥咎茶

齊志會稽剡縣刻石山相傳爲名不知文字所在昇明末縣

民倪襲祖行獵忽見石上有文凡三處苔生其上字不可識

刊苔去之大石文曰此齊者黃石公之化氣也立石文曰黃

天星姓蕭字道成得賢師天下太平小石文曰刻石者誰會

稽南山李斯刻秦望之封也益州齊后山父老相傳其名亦

不知所起昇明三年有沙門玄暢於山邱立精舍其日太祖受禪日也又元徽四年太祖從南郊望氣者陳安寶見太祖身上黃紫氣屬天安寶謂親人王洪範曰我少來未嘗見軍上有如此氣也太祖年十七夢乘青龍西行逐日日將薄山乃止覺而恐懼家人問占者云至貴之象也蘇偁云青木色日暮者宋氏末運也又建元元年世祖拜皇太子日有慶雲在日邊三年華林園醴泉堂東忽有瑞雲周圍十許丈高下與景雲樓平五色藻密光彩映山徘徊良久行轉南行過長船入華池

魏志真君五年二月張掖郡上言往曹氏之世邱池縣大柳谷山石表龍馬之形石馬脊文曰天討曹而晉氏代魏今石文記國家祖宗諱者受命之符乃遣使圖寫其文大石有五

皆青質白章間成文字其二石記張呂之前已然之効其三石記國家祖宗以至於今其文記昭成皇后諱繼世四六天法平天下大安凡十四字次記太祖道武皇帝諱應王載記千歲凡七字次記太宗明元皇帝諱長子二百二十年凡六字次記太平天王繼世主治凡八字次記皇太子諱昌封太山凡五字初上封太平王天文圖錄又授太平真君之號與石文相應太宗名諱之後有一人象攜一小兒見者皆曰上愛皇孫提攜臥起不離左右此卽上象靈契真天授也於是衛大將軍樂安王範輔國大將軍建寧王崇征西大將軍常山王素征南大將軍恆農王奚斤上奏以石文之徵宣告四海令方外僭竊知天命有歸太和元年冬十月南部尙書安定侯鄧宗慶奏鄉郡民李飛太原民王顯前列稱詣京南山

採藥到遊越谷南嶺下見清碧石柱數百枚被詔案檢稱所見青碧柱長者一匹相接而上或方一尺二寸或方一尺方楞悉就其數既多不可具數請付作曹採用奏可時人神異之顯祖皇興三年六月尉元表臣於彭城遣別將以八月至睢口邀賊將陳顯達有戰士於營外五里芻牧見一白頭翁乘白馬將軍呼之語稱至十八日辰必來到此語汝將軍領衆從東北臨入我當驅賊令走申時賊必大破宿豫淮揚皆尅無疑我當與汝國家淮畔爲斷下邳城我當驅出不勞兵力後十日此人復於彭城南戲馬臺東二里見白頭翁亦乘白馬從東北來呼此人謂曰我與東海四瀆太山北嶽神共行淮北助汝二將蕩除已定汝上下喜不因忽然不見詔元於老人前後見所爲壇表記之肅宗孝昌二年十月揚州刺

史李憲表云門下督周伏興以去七月患假還家至十一日
夜夢度肥水行至草堂寺南遙見七人一人乘馬著朱衣籠
冠六人從後興路左而立至便再拜問興何人興對曰李公
門下督暫使硤石其人語興君可回我是孝文皇帝中書舍
人遣語李憲勿憂賊堰此月破矣興行兩步錄興姓字令興
速白興寤曉遂還城具言夢狀七月二十七日堰破

北史孝昭時有尙書令史姓趙於鄴見文宣從楊情燕子獻
等西行言相與復讐帝在晉陽宮與毛夫人亦見焉遂漸危
篤備禳厭之事或煮油四灑或持炬燒逐諸厲方出殿梁山
騎棟上歌呼自若了無懼容時有天狗下乃於其所講武以
厭之有兔驚馬帝墜而絕肋

厥罰恆燠

宋志庶徵之恆燠劉向班固以冬亡冰及霜不殺草應
之京房易傳曰夏則暑殺人冬則物華實齊志傳曰雷

於天地爲長子以其首長萬物與之出入故雷出萬物出雷入萬物入夫雷者人君之象入則除害出則興利雷之微氣以正月出其有聲者以二月出以八月入其餘微者以九月入冬三月雷無出者若是陽不閉陰則出涉危難而害萬物也又曰雷電所擊蓋所感也皆思心有尤之所致者也

宋志順帝昇明元年十月於潛桃李柰結實文帝元嘉四年

十一月癸丑雷五年六月丙寅震太廟破東鴟尾徹壁柱六

年正月丙寅雷且雪七年十月丙子雷八年十二月庚辰雷

九年十一月甲戌雷且雪十四年震初寧陵口標四破至地

前廢帝景和元年九月甲午雷震明帝泰始二年九月辛巳

雷震四年十月辛卯雷震十一月癸卯朔雷震乙巳雷震六

年十一月庚午雷後廢帝元徽三年九月戊戌雷丁未雷戊

午雷震十月辛未雷甲戌又雷順帝昇明三年三月二十四

日丙申震建陽門

南史元嘉三十年十月雷二十一年十月雷且電

齊志建元元年十月壬午夜電光因雷鳴十月庚戌電光有
頃雷鳴久而止永明五年正月戊申夜西北雷聲六年十月
甲申夜陰細雨始聞雷鳴於西北上七年正月甲子夜陰雷
鳴西南坤宮隆隆一聲而止八年正月庚戌夜雷起坎宮水
門其音隆隆一聲而止九年二月丙子西北有電光因聞雷
聲隆隆仍續十聲而止十年二月庚戌夜南方有電光因聞
雷聲隆隆相續丁亥止十年庚子雷電起西北十一月丁丑
西南有光因聞雷聲隱隱再聲而止西南坤宮十二月甲申
陰雨有電光因聞西南及西北上雷鳴頻續三聲丙午夜聞
西北上雷頻續二聲辛亥雷雨又建元二年閏六月丙戌戊
夜震電四年五月五日雲電闔都雷震於樂遊安昌殿電火

焚蕩盡永明八年四月六日雷震會稽山陰恆山保林寺刹
上四破電火燒塔下佛面窗戶不異也永明中震東宮南門
無所傷毀殺食官一人十一年三月震於東齋棟崩左右密
欲治繕竟陵王子良曰此豈可治留之志吾過且旌天之愛
我也

魏志鴻範論曰雷陽也雲陰也有雲然後有雷有臣然後有
君也雷託於雲君託於臣陰陽之合也故無雲而雷示君獨
處無臣民也顯祖皇興元年七月東北無雲而雷二年七月
東北有聲如雷世宗延昌元年二月有聲起東北南引殷殷
如雷二聲而止

又世祖真君五年八月華林園諸果盡花高祖延興五年八
月中山桃李花承明元年九月幽州民齊淵家杜樹結實旣

成一朝盡落花葉復生七日之中蔚如春狀世宗景明四年十一月齊州東清河郡桃李花延昌四年閏十月辛亥京師柰樹花

隋志陳太建元年七月大雨震萬安陵華表八年又震慧日寺刹瓦官寺重閣門下一女子震死京房易飛候曰雷雨霹靂邱陵者逆先人令爲火殺人者人君用讒言殺正人十年三月震武庫武庫者兵氣之所聚也而震之天戒若曰宜戢兵以安百姓其年六月又震太皇寺刹莊嚴寺露槃重陽閣東樓鴻臚府門天戒若曰國威已喪不務修德後必有恃佛道耽宴樂棄禮儀而亡國者

又齊武平元年夏震丞相段孝先南門柱又天保八年三月大熱人或暍死劉向五行傳曰視不明用近習賢者不進不

肖者不遐百職廢壞庶事不從其過在政教舒緩

厥極疾時則有草妖

齊志傳曰犯上者不誅則草犯霜而不死或殺不以時事在殺生失柄故曰草妖也一日

草妖者失眾之象也

宋志宋順帝昇明二年宣城山中生紫芝一株所在獲以獻

又文帝元嘉十一年朱草生蜀郡郫縣王之家益州刺史甄

法崇以聞又文帝元嘉七年七月乙酉建康頡檐湖二蓮一

蒂十六年七月壬申華池雙蓮同幹十年七月己丑華林天

淵池芙蓉異花同蒂十九年八月壬子揚州後池二蓮合華

刺史始興王濬以獻二十年五月廬陵郡池芙蓉二花一蒂

太守王淵以聞二十年六月壬寅華林天淵池芙蓉二花一

蒂園丞陳襲祖以聞二十年夏永嘉郡後池芙蓉二花一蒂

太守臧藝以聞二十年七月吳興郡後池芙蓉二花一蒂太

守孔山士以聞二十年揚州後池芙蓉二花一蒂刺史始興
王濬以獻二十年四月樂游苑池二蓮同榦苑丞梅道念以
聞二十一年六月丙午華林園天淵池二蓮同榦園丞陳襲
祖以聞二十二年七月東宮玄圃園池二蓮同榦內監殿守
舍人宮勇民以聞二十三年六月壬寅華林天淵池芙蓉二
花一蒂園丞陳襲祖以聞二十三年六月辛丑太子西池二
蓮共榦池統胡永祖以聞二十三年八月己酉魚邑三周池
二蓮同榦園丞徐道興以聞孝武帝孝建二年六月庚寅玄
武湖二蓮同榦孝武帝大明五年藉田芙蓉二花同蒂大司
農蕭邃以獻明帝太始二年八月丙辰五城澳池二蓮同榦
都水使者羅僧愍以獻太始二年八月己未豫州刺史山陽
王休祐獻蓮二花一蒂太始五年六月甲子嘉蓮生湖孰南

臺侍御史竺曾度以聞太始六年六月王子嘉連生東宮玄圃池皇太子以聞

南史泰始四年正月雨草於宮

齊志永元中御刀黃文濟家齋前種菖蒲忽生花光影照壁成五采其兒見之餘人不見也又昇明二年宣城臨成縣於藉山獲紫芝一枝永明八年五月陽城獲紫芝一株隆昌元年正月襄陽縣獲紫芝一莖

南史陳後主時臨平湖草舊塞忽然自通

魏志世宗景明三年七月魯陽獸烏芝王者慈仁則生食之令人度世

隋志高祖時上黨有人宅後每夜有人呼聲求之不得去宅一里所但見人參一本枝葉峻茂因掘去之其根五尺餘具

體人狀呼聲遂絕蓋草妖也視不明之咎

時則有羽蟲之孽

羽原本作傑。齊志劉歆視傳有羽蟲之孽謂雞既也。班固案易雞屬巽今以羽蟲之孽類是

也依歆說附視傳云

宋志宋武帝永初三年臨軒拜徐羨之為司徒百僚陪位有

二野鶴集太極鳴尾鳴呼少帝景平二年春鶴巢太廟西鳴

尾驅去復還文帝元嘉二年春有江鷗鳥數百集太極殿前

小階內 又鳳凰者仁鳥也不刳胎剖卵則至或翔或集雄

曰鳳雌曰凰蛇頭燕頰龜背鼈腹鶴頸雞喙鴻前魚尾青首

駢翼鷺立而鴛鴦思首戴德而背負仁項荷義而膺抱信足

履正而尾繫武小音中鐘大音中鼓延頸奮翼五光備舉興

八風降時雨食有節飲有儀往有文來有嘉遊必擇地飲不

妄下其鳴雄曰節節雌曰足足晨鳴曰發明書鳴曰上朔夕

鳴曰歸昌昏鳴曰固常夜鳴曰保長其樂也徘徊雍雍
喈喈唯鳳凰爲能究萬物通天祉象百狀達王道率五音成
九德備文武正下國故得鳳之象一則過之二則翔之三則
集之四則春秋居之五則終身居之然宋武帝永初元年七
月戊戌鳳凰見會稽山陰文帝元嘉十四年三月丙申大鳥
二集秣陵民王顓園中李樹上大如孔雀頭足小高羽毛鮮
明文采五色聲音諧從衆鳥如山雞者隨之如行三十步頃
東南飛去揚州刺史彭城王義康以聞改鳥所集永昌里曰
鳳凰里孝武帝孝建元年正月庚申鳳凰見丹徒愷賢亭雙
鵠爲引衆鳥陪從征虜將軍武昌王渾以聞外如宋文帝元
嘉二十年五月赤雀集南平郡府內史臧綽以聞孝武帝孝
建元年五月己亥臨沂縣魯尙斯軍人於城上獲赤雀太傅

假黃鉞江夏王義恭以獻蒼鳥者賢君修行孝慈於廣姓不
好殺生則來宋孝武帝大明元年五月丁丑蒼鳥見襄陽縣
二年四月甲申蒼鳥見襄陽雍州刺史王玄謨以獻又宋武
帝永初二年二月赤鳥六見北海都昌孝武帝大明五年六
月戊子赤鳥見蜀郡益州刺史劉思考以獻白燕者師曠時
銜丹書來至宋文帝元嘉元年七月壬戌白燕集齊郡城游
翔庭宇經九日乃去衆燕隨從無數十四年白燕集荊州府
門刺史臨川王義慶以聞十八年六月白燕產丹徒縣南徐
州刺史南譙王義宣以獻二十年五月白燕集南平鄉府內
內史臧綽以聞二十一年白燕見廣陵南兗州刺史廣陵王
誕以獻二十四年五月辛未白燕集司徒府西園太尉江夏
王義恭以聞二十五年八月壬子白燕見廣陵城南兗州刺

史徐湛之以聞二十六年五月戊寅白燕產衡陽三墓亭郎
中令朱曠之獲以聞二十七年五月甲戌白燕產京口南徐
州刺史始興王濬以聞六月壬辰白燕見秣陵丹陽尹徐湛
之以獻孝武帝大明二年五月乙巳白燕產南郡江陵民家
荊州刺史朱修之以獻五月甲子白燕二產山陽縣舍南兗
州刺史竟陵王誕以獻六月甲戌白燕產吳郡城內太守王
翼之以獻三年五月甲申白燕產武陵臨沅民家郢州刺史
孔靈符以聞四年六月乙卯白燕見平昌青州刺史劉道隆
以獻明帝太始二年六月白燕見陵零獲以獻又宋武帝永
初二年六月丁酉白鳥見吳郡婁縣太守孟顛以獻文帝元
嘉二年十一月丙辰白鳥見山陽太守院寶以獻三年三月
甲戌丹陽湖熟薛爽之獲白鳥以獻十一年六月乙巳吳郡

海鹽王說獲白鳥揚州刺史彭城王義康以獻十三年三月
戊辰義興陽羨令獲白鳥太守劉禎以獻十九年五月海陵
王文秀獲白鳥南兗州刺史臨川王義慶以獻十月白鳥產
晉陵暨陽僑民彭城劉原秀宅樹原秀以聞二十年七月彭
城劉原秀又獲白鳥以獻二十四年八月乙巳白鳥見晉陵
南徐州刺史廣陵王誕以獻孝武帝大明元年四月甲申白
鳥見南郡江陵明帝太始二年六月丁巳白鳥見吳郡海鹽
太守顧覲之以獻九月壬寅白鳥見吳興烏程太守郗顛以
獻又宋文帝元嘉元年七月乙巳白雀見齊郡昌國四年七
月乙酉白雀見北海劇八年五月辛丑白雀集左衛府十一
年五月丁丑齊郡西安宗顯獲白雀青州刺史段宏以獻十
四年五月甲午白雀集費縣員外散騎侍郎顏敬家獲以獻

白雀二見荊州府客館十五年五日辛未白雀集建康都亭
里揚州刺史彭城王義康以聞六月白雀見建康定陰里彭
城王義康以獻八月白雀見西陽江州刺史南譙王義宣以
獻十七年五月壬寅白雀二集荊州後園刺史衡陽王義季
以獻十八年七月吳郡鹽官于玄獲白雀太守劉禎以獻二
十年五月乙卯秣陵衛猗之獲白雀丹陽尹徐湛之以獻二
十二年四月丙子白雀見東安郡徐州刺史臧質以獻閏五
月丙午白雀見華林園員外散騎侍郎長沙王瑾獲以獻六
月庚申彭城蕃縣時佛護獲白雀以獻二十四年四月白雀
產吳郡鹽官民家太守劉禎以獻六月己亥白雀五集長沙
廟長沙宛瑾以聞二十五年五月丁丑白雀二見京都材官
吏黃公歡軍人丁田夫各獲以獻二十七年六月乙卯白雀

見濟南郡薛榮以獻二十八年八月己巳崇義軍人獲白雀
一雙太子左率王錫以獻二十九年四月癸丑白雀見會稽
山陰太守東海王禕獲以獻孝武帝孝建元年五月己亥臨
沂縣魯尙期於城上得白雀太傅假黃鉞江夏王義恭以獻
二年六月丙子左衛軍獲白雀以獻三年閏三月辛酉黃門
侍郎庾徽之家獲白雀以獻五月丁卯白雀見建康獲以獻
孝武帝大明元年四月戊申白雀見尋陽五月甲寅白雀二
見勃海獲以獻五月甲子白雀見建康獲以獻六月丁亥白
雀見零陵祁陽獲以獻七月辛亥白雀見南陽宛獲以獻二
年五月丁未白雀見建康揚州刺史西陽王子尙以獻六月
丁亥白雀見河東定襄縣荊州刺史宋修之以獻三年四月
庚戌白雀見秣陵丹陽尹劉秀之以獻五月壬午太宰府崇

藝軍人獲白雀太宰江夏王義恭以獻四年五月辛巳白雀
見廣陵侍中顏師伯以獻五年四月庚戌白雀見晉陵太守
沈文叔以獻五月白雀見尋陽江州刺史桂陽王休範以獻
五月癸未白雀二見尋陽江州刺史桂陽王休範以獻五月
癸未白雀二見濟南青州刺史劉道隆以獻十月白雀見太
原青州刺史劉道隆以獻六年八月辛巳白雀見齊郡青冀
二州刺史劉道隆以獻七年四月乙未白雀集廬陵王第廬
陵王敬先以獻四月乙丑白雀見歷陽太守建平王景素以
獻五月辛未白雀見汝陰豫州刺史垣護之以獻六月白雀
見寶成南豫州刺史尋陽王子房以獻十月丁卯白雀見建
康丹陽尹永嘉王子仁以獻十一月車駕南巡隸水師於梁
山中江白雀二集華蓋前廢帝永光元年四月乙亥白雀見

會稽東揚州刺史尋陽王子房以獻六月丙子白雀見彭城
徐州刺史義陽王昶以聞明帝太始二年七月戊子白雀見
虎檻洲都督征討諸軍建安王休仁以聞六年七月壬午白
雀二見廬陵吉陽內史江孜以聞明帝大豫元年六月辛丑
白雀見廣州刺史孫超以獻後廢帝元徽五年四月己巳白
雀二見尋陽柴桑江州刺史邵陵王友以獻孝武帝大明六
年三月丙午青雀見華林園明帝太始二年九月庚寅青雀
見京城內南徐州刺史桂陽王休範以獻又宋文帝元嘉十
八年八月庚午會稽山陰商世寶獲白鳩眼足並赤揚州刺
史始興王濬以獻太子率更令何承天上表頌之二十四年
九月白鳩又見庚戌中領軍沈演之上表頌之宋文帝元嘉
五年五月庚辰白雉見東莞莒縣太守劉玄以聞十六年二

月白雉見陳郡豫州刺史長沙王義欣以獻十八年二月癸亥白雉見南汝陰宋縣太守文道恩以獻二十年六月白雉見高平方與縣徐州刺史臧質以獻二十六年三月戊寅白雉見東安沛郡各一徐兗二州刺史武陵王獲以獻孝武帝大明二年三月己巳白雉雌雄各一見海陵南兗州刺史竟陵王誕以獻五年十二月白雉見秦郡南兗州刺史晉安王子勛以獻八年二月丁卯白雉見南郡江陵荊州刺史臨海王子玉以獻前廢帝永光元年正月丙午白雉見渤海青州刺史王玄謨以獻三月甲午朔白雉見新蔡豫州刺史劉德願以獻又宋文帝元嘉二十二年白鵲見新野鄧縣雍州刺史蕭思話以聞二十六年五月癸酉白鵲見建康宗孝里揚州刺史始興王濬以獻孝武帝大明七年三月辛巳白鵲見

汝南安陽太守申令孫以獻宋文帝元嘉二十二年湘州刺史南平王鑠獻赤鸚鵡孝武帝大明三年正月丙申嬰皇國獻赤白鸚鵡各一宋文帝元嘉二十四年十月甲午揚州刺史始興王濬獻白鸚鵡孝武帝大明五年正月丙子交州刺史垣閎獻白孔雀明帝泰始三年五月乙亥白鵠見京兆雒州刺史巴陵王休若以獻果何祥哉

齊志建武二年有大鳥集建安形如水犢子其年郡大水三年大鳥集東陽郡太守沈約表云鳥身備五采赤色居多案樂緯叶圖徵云焦明鳥質赤至則水之感也永明二年四月烏巢內殿東鳴尾三年大鳥集會稽上虞其年縣大水又建元元年八月男子王約獲白雀一頭九月秣陵縣獲白雀一頭二年四月白雀集郢州府館五月白雀見會稽永興縣

永明元年五月郢州丁坡屯獲白雀一頭三年七月安城王
暘第獲白雀一頭九月南郡江陵縣獲白雀一頭四月七日
白雀見臨汝縣七年六月鹽官縣獲白雀一頭八年天門臨
澧縣獲白雀一頭九年七月吳郡錢塘縣獲白雀一頭八月
豫州獲白雀一頭十年五月齊郡獲白雀一頭建元元年五
月白鳥見巴郡永明四年三月三足鳥巢南安中陶縣庭八
年四月陽羨縣獲白鳥一頭隆昌元年四月陽羨縣獲白鳥
一頭又永明八年始興郡昌樂村獲白鳩一頭二年彭澤縣
獲白雉一頭七年鬱林獲白雉一頭十年青州涇液戍獲白
雉一頭

按諸白若是之多而
以爲瑞舊史之惑也

隋志梁中大同元年邵陵王綸在南徐州坐廳事有野鳥如
戴數百飛屋梁上彈射不中俄頃失所在京房易飛候曰野

鳥入君室其邑虛君亡之他方侯景在梁將受錫命陳備物
於庭有野鳥如山鵲赤觜集於冊書之上鵠鷓鳴於殿
又陳後主時蔣山有衆鳥鼓翼而鳴曰奈何帝京房易飛候
曰鳥鳴門闕如人音邑且亡蔣山吳之望也鳥於上鳴吳空
虛之象及陳亡建康爲墟又陳未亡時有一足鳥集於殿庭
其觜畫地成文曰獨足上高臺盛草變爲灰欲知我家處朱
門當水開獨足者叔寶獨行無衆之應盛草成灰者陳政蕪
穢被隋火德所焚除也叔寶至長安館於都水臺上高臺當
水開之義也

魏志高祖太和七年六月青州獻三足鳥王者慈孝天地則
至十三年十一月滎陽獻三足鳥十四年六月懷州獻三足
鳥十五年閏月濟州獻三足鳥十七年五月冀州獻三足鳥

二十年六月豫州獻三足烏二十三年六月冀州獻三足烏
世宗景明元年五月徐州獻三足烏三年二月豫州獻三足
烏四年六月幽州獻四足烏正始元年二月冀州獻三足烏
五月幽州獻三足烏是月相州獻三足烏六月定州獻三足
烏二年五月肆州獻三足烏三年三月豫州獻三足烏是月
豫州又獻三足烏永平元年四月豫州獻三足烏延昌三年
二月冀州獻三足烏肅宗熙平元年四月汲郡獻三足烏二
年四月東郡獻三足烏是月豫州獻三足烏南兗州又獻三
足烏神龜元年八月雍州獻三足烏二年五月潁川郡獻三
足烏正光元年四月濟州獻三足烏是月濟州又獻三足烏
二年閏月東郡獻三足烏三年五月東郡獻三足烏潁川郡
許昌縣獻三足烏肆州獻三足烏六月冀州獻三足烏四年

六月瀛州獻三足烏出帝太昌元年五月齊獻武王獲三足
烏以獻孝靜元象二年四月京師獲三足烏武定三年五月
瀛州獻三足烏四年四月潁州獻三足烏五月潁州又獻三
足烏又太宗泰常三年十一月京師獲白梟肅宗正光二年
八月己卯獲禿鶯具於殿內孝昌二年四月民有送死鴨雛
一頭兩身四足四翅兩尾孝靜天平二年三月雄雉飛入尙
書省殿中獲之又高祖太和二年七月白鳥見於涼州王者
宗廟肅敬則至九月白鳥見於京師三年五月白鳥見於豫
州九月白鳥見於秦州十七年六月兖州獻白鳥二十三年
十二月司州獻白鳥世宗正始二年五月司州獻白鳥三年
九月潁川郡獻白鳥四年七月潁川郡又獻白鳥永平元年
四月潁川獻白鳥延昌二年八月平陽郡獻三足烏三年六

月冀州獻白鳥肅宗正光元年十月幽州獻白鳥孝靜天平
二年七月齊獻武王獲白鳥以獻元象元年五月冀州獲白
鳥二年八月徐州表濟陰郡廳事前槐樹鳥巢於上鳥母死
有鵲銜食舖鳥兒不失其時並皆長大賞太守帛十匹興和
四年四月魏郡貴鄉縣獲白鳥雛五月京師獲白鳥是月陽
夏郡獲白鳥七月北豫州獻白鳥十月瀛州獻白鳥武定元
年六月東郡民獻白鳥三年五月北豫州獻白鳥是月廣宗
郡獻白鳥潁州又獻白鳥六月滄州獻白鳥四年四月梁州
獻白鳥八月陽夏郡獻白鳥高祖太和二年二月涼州獻赤
鳥周武王時銜麥至而克殷肅宗熙平元年二月赤鳥見肆
州秀容郡神龜元年四月赤鳥見并州之晉陽縣世宗景明
二年十二月南青州獻蒼鳥君修行孝慈萬姓不好殺生則

至正始二年五月雍州獻蒼烏六月雍州又獻蒼烏永平二
年四月河內獻蒼烏肅宗熙平元年六月冀州獻蒼烏前廢
帝普泰元年五月河內獻蒼烏孝靜興和四年五月濟州獻
蒼烏七月瀛州又獻蒼烏武定元年四月兗州獻蒼烏五月
濟州又獻蒼烏二年五月京師獲蒼烏三年六月京師獲蒼
烏十月光州獻蒼烏高祖延興二年四月幽州獻白鵲四年
九月白鵲見於中山承明元年八月定冀二州俱獻白鵲十
一月定州又獻白鵲太和二年十一月洛州獻白鵲肅宗熙
平元年正月定州獻白鵲正光四年正月京師獲白鵲孝靜
興平二年五月京師獲白鵲武定二年七月林慮獻白鵲三
年六月京師獲白鵲又太祖天興五年八月上曜軍覽谷見
白鷺一太宗永興三年六月京師獲白鷺四年閏月京師又

獲白鷺泰常二年六月京師獲白鷺高祖太和二年三月白鷺見於并州八年四月白鷺集於京師是月代郡獻白鷺二十三年八月荊州獻白鷺閏月正平郡獻白鷺世宗景明三年六月涇州獻白鷺肅宗熙平元年七月京師獲白鷺孝靜元象元年八月西中府獻白鷺興和二年三月京師獲白鷺武定三年六月北豫州獻白鷺太宗泰常八年五月鴈門獻白雀王者爵祿闕則白雀至世祖神麇元年九月滄水郡獻白雀十月魏郡獻白雀真君八年五月鴈門郡獻白雀高祖延興二年二月白雀見於扶風郡三年五月白雀見於代郡四年正月青州獻白雀太和三年五月白雀見於豫州十三年正月清河武城縣獻白雀世宗景明三年六月滎陽郡獻白雀十月薄骨律鎮獻白雀四年三月敦煌鎮獻白雀五月

京師獲白雀六月恆農郡獻白雀七月京師獲白雀正始二
年七月薄骨律鎮獻白雀三年四月獲白雀於京師十月河
州獻白雀十二月雍州獻白雀四年二月豫州獻白雀永平
三年七月京師獲白雀延昌三年七月河南郡獲白雀十一
月秦州獻白雀四年五月滎陽獻白雀八月秦州獻白雀是
月青州獻白雀是月恆州獻白雀是月洛陽獲白雀十一月
荊州獻白雀肅宗熙平元年四月京師再獲白雀七月宮中
獲白雀二年四月華州獻白雀六年相州獻白雀是月薄骨
律鎮獻白雀七月京師獲白雀八月薄骨律鎮又獻白雀是
月京師獲白雀十一月京師獲白雀神龜元年五月京師獲
白雀六月京師獲白雀二八月薄骨律鎮獻白雀二年五月
徐州獻白雀是月京師獲白雀三年七月京師又獲白雀正

光元年六月京師獲白雀二年六月光州獻白雀三年四月
京師獲白雀六月滎陽郡獻白雀八月濟州獻白雀是月光
州獻白雀九月白雀見舍人省四年六月京師獲白雀七月
京師獲白雀出帝太昌元年四月京師獲白雀孝靜天平二
年五月北豫州獻白雀三年七月京師獲白雀四年七月兗
州獻白雀元象元年五月京師獲白雀六月京師獲白雀七
月肆州獻白雀是月齊獻武王獲白雀二年五月京師獲白
雀六月齊文襄王獲白雀以獻是月南兗州獲白雀七月京
師獲白雀興和二年四月京師獲白雀閏月京師獲白雀六
月光州獻白雀七月京師獲白雀三年五月京師獲白雀四
年正月京師獲白雀六月京師獲白雀七月京師獲白雀武
定元年六月京師獲白雀七月京師獲白雀三年五月梁州

獲白雀七月京師獲白雀十月兗州獲白雀四年六月京師
獲白雀六年六月京師獲白雀世宗景明三年三月濟州獻
赤雀周文王時銜書至四年五月獲赤雀於京師永平元年
四月京師獲赤雀肅宗孝昌三年四月河南獲赤雀以獻高
宗和平四年三月冀州獻白鳩殷湯時至王者養耆老遵道
德不以新失舊則至高祖承明元年十一月冀州獻白鳩太
和二十三年七月瀛州獻白鳩八月滎陽郡獻白鳩世宗景
明三年七月涇州獻白鳩正始元年十月京師獲白鳩是月
建興郡獻白鳩二年四月并州獻白鳩七月冀州獻白鳩二
三年七月夏州獻白鳩永平元年六月洛州獻白鳩肅宗熙
平二年九月汲郡獻白鳩太祖天興二年七月并州獻白雉
周成王時越裳氏來獻四年正月上黨郡獻白雉二月并州

獻白雉五月河內郡獻白雉太宗神瑞二年十一月右民尙
書周幾獲白雉一於博陵安平以獻泰常三年正月渤海郡
高城縣獻白雉三月渤海郡南皮縣獻白雉二十一月中山
行唐縣獻白雉四年正月新興郡獻白雉十二月又獻白雉
二五年三月白雉見於河內郡世祖神麇元年二月相州獻
白雉二年二月上黨郡獻白雉高祖延興二年正月青州獻
白雉五年正月白雉見於上谷郡太和元年二月秦州獻白
雉三月白雉見於秦州十一月白雉見於安定郡二年十一
月徐州獻白雉三年正月統萬鎮獻白雉四年正月南豫州
獻白雉六年三月豫州獻白雉八年六月齊州青河郡獻白
雉十七年正月幽州獻白雉四月瀛州獻白雉二十年三月
兗州獻白雉世宗景明三年正月徐州獻白雉

隋志後齊孝昭帝卽位之後有雉飛上御座天統三年九月萬春鳥集仙都苑武成胡后生後主初有梟升后帳而鳴梟不孝之鳥不祥之應也武平七年有鸛巢太極殿又巢并州嘉陽殿雉集晉陽宮御座獲之北史皇建二年十月野雉栖於前殿之庭

又周大象二年二月有禿鶯集洛陽宮太極殿

又開皇初梁主蕭琛新起後宮有鵠鳥巢其帳隅大業末京師宮室中恆有鴻鴈之類無數翔集其間十三年十一月烏鵠巢帝帳幄驅不能止隋煬帝紀大業八年三月帝征遼東大頓見二大鳥十二年二月有二大鳥似鵬飛入大業殿止於御幄至明乃去

時則有羊駝

宋志宋孝武帝大明七年永平郡獻三角羊羊禍也

魏志高祖太和二十三年三月肆州上言陽曲縣羊生羔一頭二身一牝一牡三耳八足世宗正始元年七月鄯善鎮送羊羔一頭兩身八脚二年正月鄯善鎮送八脚羊延昌四年五月薄骨律鎮上言羊羔一頭六足兩尾

隋志開皇十二年六月繁昌楊悅見雲中二物如羝羊黃色大如新生犬鬪而墜悅獲其一數旬失所在近羊甌也洪範五行傳曰君不明逆火政之所致也狀如新生犬者羔類也雲體掩蔽邪佞之象羊國姓羔羊子也恭帝義寧二年麟遊太守司馬武獻羊羔生而無尾

時則有目痾

隋志梁太清元年丹陽有莫氏妻生男眼在頂上大如兩歲

兒墜地而言曰兒是旱疫鬼不得住母曰汝當令我得過疫
鬼曰有上官何得自由母可急作絳帽故當無憂母不暇作
帽以絳繫髮自是旱疫者二年揚徐兗豫尤甚莫氏鄉鄰多
以絳免他土效之無驗

北史齊武平五年五月大旱晉陽得死魃長二丈面頂各二
目帝聞之使刻木爲其形以獻

時則有赤膏赤祥

宋志宋孝武帝大明元年五月壬子紫氣從景陽樓上層出
狀如烟回薄良久明帝太始二年三月丙午黃紫雲從景陽
樓出隨風回久乃消華林園令臧延之以聞

齊志建武四年王晏子德元所居帷屏無故有血灑之少日
而散晏尋被誅

隋志梁天監十五年七月荆州市殺人而身不僵首墮於地
動口張目血如竹箭直上丈餘然後如雨細下

又陳太建十四年三月御座幄上見一物如車輪色正赤至
德三年十二月有赤物隕於太極殿前初下時鍾皆鳴又嘗
夜索飲忽變爲血又有血霑殿階漑漑然至御榻而火起南
史永定二年四月重雲殿東鴟尾有紫烟屬天後主時霧赤
魏志高祖太和二年十一月夜有三白氣從地出須臾變爲
黃赤光明照地十六年九月昏時赤氣見於西北長二十丈
廣八九尺食頃乃滅世宗延昌元年三月有赤氣見於天自
卯至戌肅宗正光元年十一月西北赤氣竟天畔似火氣京
師不見涼州以聞三年九月夜西北有赤氣似火爛東西一
匹餘五年五月北有赤氣東西竟天如火爛莊帝永安三年

十一月有赤氣如霧從顯陽殿階西南角斜屬步廊高二丈許連地如絳紗幔自未至戌不滅

隋志後齊河清二年太原雨血劉向曰血者陰之精傷害之象僵尸之類也明年周師與突厥入并州大戰城西伏屍百餘里京房易飛候曰天雨血染衣國亡君戮四年三月有物隕於殿庭色赤形如數斗器衆星隨者如小鈴

北史作如赤漆鼓帶小鈴

武平中有血點地自斛律明月宅至於太廟北史周靜帝時有赤氣起西方漸東行徧天隋書煬帝紀大業十三年日光四散如流血

維水沴火

南史齊永元元年七月辛未淮水變赤如血

南北史補志卷十

江甯汪士鐸

五行志第二

次四事曰聽聽之不聰是謂不謀厥咎急

齊志世祖於南康郡內作伎有絃無管忽聞空中有篋聲調

節相應

南史陳後主時有神自稱老子游於都下與人對語而不見
形言吉凶多驗得酒輒醕之經三四年乃去又船下有聲云
明年亂視之得嬰兒長三尺而無頭

魏志大興四年春新興太守上言晉昌民賈相昔年二十二
爲鴈門郡吏人句注西陁見一老父謂相曰自今以後四十
二年當有聖人出於北方時當大樂子孫承長吾不及見之

言終而過相顧視之父老化為石人相今七十下檢石人見

存至帝破慕容寶之歲四十二年

厥罰恆寒

宋志庶徵之恆寒劉歆以為大雨雪及未當雨雪而雨雪及大雨雹隕霜殺菽草皆常寒之罰也京房易傳曰

有德遭險茲謂逆命厥異寒寒誅罰過深當燠而寒盡六日亦為雹害正不誅茲謂養賊寒七十二日殺飛禽道人始去茲謂傷其寒物無霜而死漏水出戰不量敵茲謂辱命其寒雖雨物不茂又齊志傳曰雨雹君臣之象也陽之氣專為雹陰之氣專為霰陽專而陰脇之陰盛而陽薄之雹者陰薄陽之象也霰者陽脇陰之符也春秋不書霰者猶月蝕也

宋志宋文帝元嘉九年春京都雨雹溧陽盱眙尤甚傷牛馬

殺禽獸十八年三月雨雹二十五年正月積雪冰寒二十九

年五月盱眙雨雹大如雞卵孝武帝太明元年十二月庚寅

大雪平地二尺餘明帝泰始五年四月壬辰京邑雨雹後廢

帝元徽三年五月乙卯京邑雨雹又大明五年正月戊午元

日花雪降殿庭時右衛將軍謝莊下殿雪集衣還白上以為

瑞於是公卿並作花雪詩史臣按詩云先集爲霰韓詩曰霰英也花葉謂之英離騷云秋菊之落英左思云落英飄颻是也然則霰爲花雪矣草木花多五出花雪獨六出

齊志建元四年五月戊午朔雹永明元年九月乙丑雹落大如蒜子須臾乃止十一年四月辛亥雹落大如蒜子須臾滅南史梁天監元年十二月大雪深三尺

隋志梁天監三年三月六年三月並隕霜殺草京房易傳曰興兵妄誅謂亡法厥罰霜大同三年六月朐山隕霜

又梁普通二年三月大雪平地深三尺洪範五行傳曰庶徵之常雨也然尤甚焉雨陰也雪又陰畜積甚盛也皆妾不妾臣不臣之應時義州刺史文僧朗以州叛於魏臣不臣之應也大同三年七月青州雪害苗稼十年十二月大雪平地三

尺

又梁中大通元年四月大雨雹洪範五行傳曰雹陰脅陽之象也時帝數捨身爲奴拘信佛法爲沙門所制

又陳太建二年六月大雨雹十年四月又大雨雹十三年九月又雨雹

又陳太建十年八月隕霜殺稻菽

魏志洪範論曰陽之專氣爲雹陰之專氣爲霰此言陽專而陰脅之陰專而陽薄之不能相入則轉而爲雹猶臣意不合於君心也高祖延興四年四月涇州大雹傷稼承明元年四月青齊徐兗大風雹八月并州鄉郡大雹平地尺草木禾稼皆盡定州大雹殺人大者方圓二尺世宗景明元年六月雍青二州大雨雹殺麋鹿四年五月汾州大雨雹六月汾州大

雨雹草木稼雉兔皆死七月暴風大雨雹起自汾州經并相
司竟至徐州而止廣十里所過草木無遺正始二年三月齊
濟二州大雹雨雪永平二年五月南秦廣業郡大雨雹殺鳥
獸禾稼洪範論曰春秋之大雨雪猶庶徵之恆雨也然尤甚
焉夫雨陰也雪又陰也大雪者陰之稽積盛甚也一曰與大
水同冬故爲雪耳世祖始光二年十月大雪數尺眞君八年
五月北鎮寒雪人畜凍死高祖太和四年九月京師大風雨
雪三尺世宗正始元年五月武川鎮大雨雪四年二月司相
二州暴風大雨雪九月大雪肅宗正光二年四月柔玄鎮大
雪

又東魏武定四年二月大寒人畜凍死者相望於道京房易
飛候曰誅過深當燠而寒

又東魏興和二年五月大雪

又後齊河清二年二月大雪連雨南北千餘里平地數尺繁霜晝下天統二年十一月大雪三年正月又大雪平地二尺

武平三年正月又大雪

又河清元年歲大寒京房易傳曰有德遭險茲謂逆命厥異

寒讖曰殺無罪其寒必異

厥極貧時則有鼓妖

齊志聽傳曰不聰之象見則妖生於耳以類相動故曰有鼓妖也一曰聲屬鼓妖

齊志永明元年十一月癸卯夜天東北有聲至戊夜

魏志世祖大延四年十月北有聲如大鼓西北行

隋志梁天監四年十一月天清朗西南有電光有雷聲二易

曰鼓之以雷霆近鼓妖十九年九月西北隱隱有聲如雷

赤氣下至地

又陳太建二年十二月西北有聲如雷

又齊天保四年四月西南有聲如雷

又後周建德六年正月西方有聲如雷

又開皇十四年正月旦鄆州連雲山有聲如雷二十年無雲而雷京房易飛候曰國將易君下人不靜小人先命國凶有甲兵大業中滏陽石鼓頻歲鳴

時則有魚孽

宋志劉歆以為介蟲之孽謂蝗屬也

宋志宋明帝太始二年十月己巳幸華林天淵池白魚躍入

御舟又孝武大明七年春太湖邊忽多鼠其年夏水至悉變

成鯉魚民人一日取轉得三五十斛

齊志傳曰極陰氣動故有魚孽魚孽者常寒罰之符也永明

九年鹽官縣石浦有海魚乘潮來水退不得去長三十餘丈

黑色無鱗未死有聲如牛土人呼為海燕取其肉食之建元
 元年四月有大魚十二頭入會稽上虞江大者近二十餘丈
 小者十餘丈一入山陰稱浦一入永興江皆暘岸側百姓取
 食之

隋志梁大同十年三月帝幸朱方至四壘中及玄武湖魚皆
 驤首見於上若望乘輿者帝入宮而沒

又齊神武武平七年相州鷓鴣泊魚盡飛去而水涸洪範五
 行傳曰急之所致魚陰類下人象也晏子曰河伯以水為國
 以魚為百姓水涸魚飛國亡人散之象

又後周大象元年六月陽武有鯉魚乘空而鬪

又開皇十七年大興城西南四里有袁村設佛會有老翁皓
 首白裙襦衣來食而去眾莫識追而觀之行二里許不復見

但有一坡中有白魚長丈餘小魚從者無數人爭射之或弓折弦斷後竟中之剖其腹得杭飯始知此魚向老翁也又大業十二年淮陽郡驅人入子城鑿斷羅郎郭至女垣之下有穴其中得鯉魚長七尺餘昔魏嘉平四年魚集武庫屋上王肅以爲魚生於水而亢於屋水之物失其所也邊將殆棄甲之變

時則有豕甌

魏志京房傳曰凡妖象其類足多者所任邪也京房易妖曰豕生人頭豕身者邑且亂亡高祖延興元年九月有司奏豫州刺史臨淮公王讓表有猪生子一頭二身八足世宗景明四年九月梁州上言犬豕交正始四年八月京師猪生子一頭四耳兩身八足延昌四年七月徐州上言陽平戌猪生子

頭面似人頂有肉髻體無毛

隋志開皇末渭南有沙門三人行投陘北雍本作頭陀法於人場圃

之上夜見大豕來詣其所小豕從者十餘謂沙門曰阿練我

欲得賢聖道猶負他一命言罷而去又開皇末渭南有人寄

宿他舍夜中聞二豕對語其一曰歲將盡阿爺明日殺我供

歲何處避之一答曰可向水北姊家因相隨而去天將曉主

人覓豕不得意是宿客而詰之宿客言狀主人如其言而得

豕

時則有耳病

闕

時則有黑眚黑祥

宋志宋文帝元嘉二十六年三月幸京口有黑氣暴起南史

元嘉三十年正月有青黑氣從東南來覆映宮上

隋志梁承聖三年六月有黑氣如龍見於殿內近黑祥也
又陳太建五年六月西北有黑雲屬地散如猪者十餘南史
禎明二年四月郢州南浦水黑如墨

魏志世祖始光二年正月夜天東南有黑氣廣一丈長十丈
顯祖皇興三年正月河濟起黑雲廣數里掩東陽城上昏暗
如夜世宗景明三年九月黑氣四塞

隋志齊後主時有桑門貌若狂人見烏則向之作禮見沙門
則毆辱之

維火沴水

隋志陳太建十四年七月江水赤如血自建康而至荊州禎
明中江水赤自方州東至海洪範五行傳曰火沴水也禎明
二年四月郢州南浦水黑如墨

又後齊河清元年四月河濟清襄楷曰河諸侯之象應濁反清諸侯將爲天子之象

又後周大象元年六月咸陽池水變爲血

又大業三年武陽縣河清數里鏡澈十二年龍門又河清

次五事曰心維思思之不容是謂不聖厥咎

齊志泰始七年明帝遣前淮南太守孫奉伯往淮陰監元會奉伯與太祖同寢夢上乘龍上天於下捉龍脚不得覺謂太祖曰兗州當大庇生民弟不見也奉伯卒於宋又世祖年十三夢舉體生毛髮生至足又夢人指上所踐地曰周文王之田又夢虛空中飛又夢著孔雀羽衣庾温云雀爵位也又夢鳳凰從天飛下青溪宅齋前兩翅相去十餘丈翼下有紫雲氣及在襄陽夢著桑屐行度太極殿階庾温云屐者運應木

也臣案桑字爲四十而二點世祖年過此卽帝位謂著屐爲木行也屐有兩齒有聲是爲明兩之齒至四十二而行卽真矣及在郢州夢人從天飛下頭插筆來畫上衣兩邊不言而去庾温釋云畫者山龍華蟲也

南史簡文帝曰吾昨夢吞土試思之殷不害曰昔重耳饋塊卒反晉國陛下所夢將符是乎帝曰儻幽冥有徵冀斯言不妄後果有土囊之禍

又陳後主夢黃衣圍城乃盡去繞城橘樹又德教學士沈君道夢殿前長人朱衣武冠頭出欄上攘臂怒曰那忽受叛蕭誤人事後主聞之忌二蕭故遠散其衆以巖爲東揚州刺史璣爲吳州刺史又初武帝始卽位其夜奉朝請史普直宿省夢有人自天而下導從數十至太極殿前北面執玉策金字

曰陳氏五帝三十二年

北史河清四年有神見於後園萬壽堂前山穴中其體壯大
不辨其面兩齒絕白長出於脣帝置宿嬪御已下七百人咸
見焉帝又夢之又後主於華林園立貧窮村舍帝自弊衣為
乞食兒又為窮兒之市躬自交易寫築西鄙諸城黑衣為羌
兵鼓噪陵之親率內參臨拒或實彎弓射人自晉陽東巡單
馬馳驚衣解髮散而歸又好不急之務會一夜索燭及旦得
三升初河清末武成夢大蝟攻破鄴城故索境內蝟膏以絕
之識者以後主名聲與蝟相協亡齊徵也

厥罰恆風

齊志思心傳曰心者土之象也思心不睿其過在督亂
失紀風於陽則為陰於陰則為大臣之象專恣而氣盛

故罰常風心五事主猶土為五行主也一日陰陽相薄偏氣
陽多為風其甚也常風陰氣多者陰而不雨其甚也常陰一
日風宵起而晝時以應常陰同象也

宋志宋少帝景平二年正月朔旦暴風發殿庭會翻揚數十丈文帝元嘉二十六年二月壽陽驟雨有回風雲霧廣三十許步從南來至城西回散滅當其衝者室屋樹木摧倒二十九年三月大風拔木飛瓦三十年正月大風拔木雨凍殺牛馬雷電晦冥孝武帝大明七年風吹初寧陵隧口左標折鍾山通天臺新成飛倒散落山澗前廢帝永光元年正月朔京邑大風明帝泰始二年三月京邑大風四月京邑大風五月京邑大風乙酉又大風九月京邑大風後廢帝元徽二年七月京邑大風三年三月京邑大風六月京邑大風四年十一月京邑大風五年三月京邑大風發屋折木六月京邑大風齊志建元元年十一月庚戌風夜暴起雲雷合冥從戌亥上來四年十一月甲寅酉時風起小駛至三更雪落風轉浪津

永明四年二月丙寅巳時風迅急十一月己丑戌時風迅急
從西北戌亥上來五年五月乙酉子時風迅急從西北戌亥
上來七年正月丁卯陽徵陰賊之日時加子風起迅急從北
方子丑上來暴疾浪津寅時止八年六月乙酉加子時風起
迅急暴疾浪津發屋折木塵沙從西南未上來因雷雨須臾
風微雨止九年七月甲寅陽羽廉貞之日時加亥風起迅急
從東方暴疾彭勃浪津至乙卯陰賊時漸微名羽動羽九月
乙丑時加未雷驟雨風起迅急暴疾浪津從西北戌上來十
月壬辰陽羽姦邪之日時加丑風起從北方子丑上來暴疾
浪津迅急塵埃五日寅時漸微名羽動宮十年正月辛巳陽
商寬夫之日時加寅風從西北上來暴疾浪津迅急揚沙折
木酉時止二月甲辰陽徵姦邪之日時加辰風迅急從西北

亥上來暴疾浪津至酉時止三月丁酉陽徵廉貞之日時加
未風從北方子丑上來迅急暴疾浪津戌時止七月庚申陰
角貪狼之日時加午風從東北丑上來迅急浪津至辛酉已
時漸微十一年二月庚寅陽角廉貞之日時加亥風從西北
亥上來迅急浪津丑時漸微爲角動角七月甲寅陽羽廉貞
之日時加巳風從東北寅上來迅疾浪津發屋折木戊夜漸
微爲羽動徵己巳陽角寬大之日時加未風從戌上來暴疾
良久止爲角動商及宮建昌元年三月乙酉未時風起浪津
暴急從北方上來應本傳晉亂建武二年三年四年每秋七
月八月輒大風三吳尤甚發屋折木殺人永元元年七月十
二日大風京師十圍樹及官府居民屋皆拔倒
隋志梁天監六年八月戊戌大風折木承聖三年十一月癸

未帝閱武於南城北風大急普天昏闇

又陳天嘉六年七月癸未大風起西南廣百餘步吹倒靈臺

候樓太建十二年六月壬戌大風吹壞臯門中闔十二年九

月夜又風發屋拔樹至德中大風吹倒朱雀門禎明三年六

月丁巳大風自西北激濤水入石頭淮

魏志京房易傳曰眾逆同志至德乃潛厥異風太宗永興三

年二月京師大風十一月又大風四年正月元會而大風晦

冥乃罷五年十一月京師大風起自西方神瑞元年四月京

師大風二年正月京師大風世祖太延二年四月京師暴風

宮牆倒殺數十人三年十二月京師大風揚沙折樹真君元

年二月京師有黑風竟天廣五丈餘高宗和平二年三月京

師大風晦冥高祖延興五年五月京師赤風太和二年七月

武川鎮大風吹失六家羊角而上不知所在雍州赤風三年
六月相州大風從西上來發屋折樹七年四月相豫二州大
風八年三月冀定相三州大風四月濟光幽肆雍齊六州暴
風九年六月濟洛肆相四州及靈邱廣昌鎮暴風折木十二
年五月京師連日大風甲辰尤甚發屋拔樹六月京師大風
十四年七月京師大風拔樹發屋二十三年八月徐州自甲
寅至己未大風拔樹閏月河州暴風大雨雹世宗景明元年
二月幽州暴風殺一百六十一人三年閏月京師大風拔樹
發屋吹折閫闔門關九月幽岐梁東秦州暴風昏霧拔樹發
屋四年三月司州之河北河東正平平陽大風拔樹正始元
年七月東秦州暴風拔樹發屋二年二月有黑風羊角而上
起於柔玄鎮蓋地一頃所過拔樹甲辰至於營州東入於海

四年五月京師大風永平元年四月京師大風拔樹三年五月南秦州廣業仇池郡大風發屋拔樹延昌四年三月京師暴風從西北上來發屋折樹肅宗熙平二年九月瀛州暴風大雨自辛酉至於乙丑正光三年四月京師暴風大雨發屋折樹四年四月京師大風孝昌二年五月京師暴風拔樹發屋吹平昌門扉壞永寧九層浮屠搯折前廢帝普泰元年夏大風雨吹普光寺門屋於地孝靜武定七年三月潁川大風隋志後齊河清二年大風三旬乃止天統三年五月大風晝晦發屋拔樹四年六月大風拔木折樹七年三月大風起西北發屋拔樹五日乃止

大風四代齊光出無乘齊大風暴

又開皇二十年十一月京師大風發屋拔樹秦隴壓死者千餘人地大震鼓皆應淨刹寺鐘三鳴佛殿門鎖自開銅像自

出戶外鐘鼓自鳴者近鼓妖也揚雄以爲人君不聰爲衆所惑空名得進則鼓妖見仁壽二年西河有胡人乘騾在道忽爲迴風所飄并一車上千餘尺乃墜皆碎焉

厥極凶短折時則有脂夜之妖

隋志梁承聖二年十月丁卯大風晝晦天地昏暗近夜妖也南史天監二年十一月乙卯雷電大雨晦

又陳禎明三年正月朔旦雲霧晦冥人鼻辛酸洪範五行傳曰王失中臣下強盛以蔽君明則雲陰

南史太建四年九月壬辰晦夜明其氣與螟蝻人知也魏志班固說夜妖者雲氣並起而杳冥故與常風同象也温而風則成螟蝻之孽世宗正始元年六月乙巳晦八月甲辰

晝晦

隋志東魏武定四年冬大霧六日晝夜不解洪範五行傳曰
晝而晦冥若夜者陰侵陽臣將侵君之象也

北史齊天統三年五月乙未大風晝晦發屋折樹

隋志周大象二年尉迴敗於相州坑其黨與數萬人於遊豫
園其處每聞鬼夜哭聲

又仁壽中仁壽宮及長城之下數聞鬼哭大業八年楊玄感
作亂於東都尙書樊子蓋坑其黨與於長夏門外前後數萬
泊于末年數聞其處鬼哭有呻吟之聲

時則有華孽

華當爲夸夸蚘蟲之
生於土而遊於土者

隋志梁大同初大蝗籬門松柏葉皆盡洪範五行傳曰介蟲
之孽與魚同占京房易飛候曰食祿不益聖化天視以蟲蟲
無益於人而食萬物也是時公卿皆以虛澹爲美不親職事

無益食物之應也

又陳後主時有張貴妃孔貴嬪並有國色稱爲妖艷後主惑之寵冠宮掖每充侍從詩酒爲娛一人後庭數旬不出荒淫侈靡莫知紀極府庫空竭頭會箕歛天下怨叛將士離心敵人鼓行而進莫有死戰之士女德之咎也及敗亡之際後主與孔姬俱投於井隋師執張貴妃而戮之以謝江東

魏志鴻範論曰刑罰暴虐取利於下貪饕無厭以興師動衆取邑治城而失衆心則蟲爲害矣高祖太和五年七月敦煌

鎮

屯

永

各

盡

六

年

七

月青雍二州虻蚘害稼八月徐東徐

兗濟平原光七州平原枋頭廣阿臨濟四真蝗害稼七年四

月相豫三州蝗害稼八年三月冀州相三州虻蚘蚘害稼四月濟光幽肆齊平七州蝗六月乙巳相齊光青四州虻蚘害稼

十六年十月癸巳枹罕鎮蝗害稼世宗景明元年五月青齊
徐兗光南青六州蚘蚘害稼四年三月壬午河州大冥二麥
無遺五月光州蚘蚘害稼六月河州大蝗七月東萊郡蚘蚘
害稼正始元年六月夏司二州蝗害稼四年四月青州步屈
蟲害棗花八月涇州黃鼠蝗蟲班蟲河州蚘蚘班蟲涼州司
州恆農郡蝗蟲並爲災永平元年六月涼州蝗害稼五年五
月青州步屈蟲害棗花七月蝗蟲京師蚘蚘八月青徐光三
州蚘蚘害稼三分食二肅宗熙平元年六月青齊光南青四
州蚘蚘害稼顯祖天安元年六月兗州有黑蟻與赤蟻交鬪
長六十步廣四寸赤蟻斷頭而死黑主北赤主南高祖太和
十年七月并州治中張萬壽表建興濩澤縣民賈日成以去
四月中養蠶有絲網成幕中有卷物似絹帶長四尺廣三寸

薄上復得黃繭二狀如履形世宗正始二年三月徐州蠶蛾食人甍殘者一百一十餘人死者二十二人

隋志後齊武平元年槐華而不結實槐三公之位也華而不實萎落之象又齊後主有寵姬馮小憐慧而有色能彈琵琶尤工歌舞後主惑之拜爲淑妃選綵女數千爲之羽從一女之飾動費千金帝從禽於三堆而周師大至邊吏告急相望於道帝欲班師小憐意不已更請合圍帝從之由是遲留而晉州遂陷後與周師相遇於晉州之下坐小憐而失機者數矣因而國滅齊之士庶至今咎之

又後周建德二年關中大蝗

又開皇十六年并州蝗

時則有牛甌

宋志宋文帝元嘉三年司徒徐羨之大兒喬之行欲入廣莫門牛徑將入廷尉寺左右禁捉不能禁入方得出明日被收二十九年晉陵送牛角生右脅長八尺孝武帝大明三年廣州刺史費淹獻三角水牛

隋志梁武陵王紀祭城隍神將烹牛忽有赤蛇繞牛口牛禍也象類言之又爲龍蛇之孽魯宣公三年郊牛之口傷時以爲天下不享棄宣公也五行傳曰逆君道傷故有龍蛇之咎魏志洪範論易曰坤爲牛坤土也土氣亂則牛爲怪一曰牛禍其象宗廟將滅一曰轉輸煩則牛生禍世宗景明二年五月冀州土言長樂郡牛生犢一頭二面三口三目三耳隋志後齊武平二年并州獻五足牛牛禍也

又後周建德六年陽武有獸三狀如牛一黃一赤一黑赤者

與黑者鬪久之黃者自傍觸之黑者死黃赤俱入於河近牛禍也

又大業初恆山有牛四脚膝上各生一蹄

時則有心腹之病

隋志陳禎明三年隋師臨江後主從容而言曰齊兵三來周師再來無弗摧敗彼何爲者都官尙書孔範曰長江天塹古以爲限隔南北今日北軍豈能飛度耶臣每患官卑彼若度來臣爲太尉矣後主大悅因奏妓縱酒賦詩不輟心腹之病也存亡之機定之俄頃君臣盱食不暇後主已不知懼孔範從而蕩之天奪其心曷能不敗陳國遂亡範亦遠徙又齊文宣帝嘗宴於東山投杯赫怒下詔西伐及陳甲兵之盛旣而泣謂羣臣曰黑衣非我所制卒不行有識者以帝精

魄已亂知帝祚之不永帝後竟得心疾耽荒酒色性忽狂暴數年而崩武成帝丁太后憂緋袍如故未幾登三臺置酒作樂侍者進白袞帝大怒投之臺下未幾而崩

時則有黃眚黃祥

宋志太始二年六月己卯日入後有黃白赤白氣東西竟天光明潤澤久乃消太始四年十一月辛未崇寧陵令上書言自大明八年至今四年二月宣太后陵明堂前後數有光及五色雲又芳香四滿又五采雲在松下狀如車蓋太始七年四月戊申夜京邑崇虛館堂前有黃氣狀如寶蓋高十許丈漸有五色道士陸修靜以聞又文帝元嘉十八年秋七月天有黃光洞照於地太子率更令何承天謂之榮光太平之祥上表稱慶南史景平二年二月天有雲五色占者以爲有兵

南史齊永明八年六月丙申大雷雨黃光竟天照地狀如金
隋志梁大同元年天雨土二年天雨灰其色黃近黃祥也京
房易飛候曰聞善不及茲謂有知厥異黃厥咎龍厥災不嗣
蔽賢絕道之咎也時帝自以爲聰明博達惡人勝己又篤信
佛法捨身爲奴絕道蔽賢之罰天寶元年正月天雨黃沙二
年簡文帝夢丸土而吞之尋爲侯景所廢以土囊壓之而斃
又陳後主時夢黃衣人圍城後主惡之遶城橘樹盡伐去之
隋高祖受禪之後上下通服黃衣未幾隋師攻圍之應也
魏志世祖太平眞君二年七月天有黃光洞照議者僉謂榮
光也高宗興光元年二月有雲五色所謂景雲太平之應也
景明二年六月有雲五色見於申酉之間出帝太昌元年六
月日初出有大黃氣如抱

隋志後周大象二年正月天雨黃土移時乃息

又開皇二年京師雨土

維金木水火沴土

齊志傳曰山之於地君之象也山崩君權損京陵易處世將變也陵轉為澤貴將為賤也又曰

土氣亂者金木水火亂之

宋志宋文帝元嘉七年四月地震十二年四月京邑地震十

五年七月地震十六年地震孝武帝大明二年四月地震大

明六年七月地震有聲自河北來魯郡山搖地動彭城城女

牆四百八十丈墜落屋室傾倒兗州地裂泉涌二年不已明

帝泰始二年四月地震四年七月東北有聲如雷地震明帝

泰豫元年閏七月東北有聲如雷地震後廢帝元徽二年四

月地震五年五月地震文帝元嘉二十五年青州城南地遠

望見地中如水有影人馬百物皆見影中積年乃滅南史永

初二年七月地震

齊志建元二年夏廬陵石陽縣長溪水衝激山麓崩長六七丈下得柱千餘口皆十圍長者一丈短者八九尺頭題有古文字不可識江淹以問王儉儉云江東不閑隸書此秦漢時柱也永明二年秋始興曲江山崩壅底溪水成陂又建武二年二月丁巳地震永元元年七月地日夜十八震南史自此至來歲晝夜不止小屋多壞九月十五日地五震

隋志梁天監五年十一月京師地震木金水火沴土也普通三年正月建寧地震六年十二月地震中大通五年正月建康地震大同三年十一月建康地震三年十月建康地震是歲會稽山賊起七年二月建康地震九年閏正月地震太清三年四月建康地再震南史普通二年八月始平郡石鼓村

地自開成井方六尺有六寸深三十二丈大同二年都下地震
生白毛長二尺又江陵先有九十九洲古老相承云洲滿百
當出天子桓元爲荊州刺史南懷篡逆乃鑿破一洲以應百
數隨而崩散宋文帝爲宜都王在蕃一洲自立俄而文帝篡
統元凶之禍此洲還沒太清末年江楊之閣浦復生一洲明
年而梁元帝及位承聖末其洲與大岸相連竟九十九云
又陳永定二年五月建康地震太建四年十一月地震禎明
元年正月地震

南史陳後主時建業城無故自壞

魏志洪範論曰地陰類大臣之象陰靜而不當動動者臣下
強盛將動而爲害之應也太宗泰常四年二月司州地震屋
室盡搖動世祖太延二年十一月并州地震四年三月京師

地震十一月幽兗二州地震真君元年五月河東地震高祖
延興四年五月鴈門崎城有聲如雷自上西引十餘聲聲止
地震十月京師地震太和元年四月京師地震五月統萬鎮
地震有聲如雷閏月秦州地震殷殷有聲二年二月兗州地
震七月并州地震有聲三年三月平州地震有聲如雷野雉
皆雉十月京師地震四年五月并州地震五年二月秦州地
震六年五月秦州地震有聲八月秦州地震有聲如雷乙未
又震七年三月秦州地震有聲四月肆州地震有聲六月東
雍州地震有聲八年十一月并州地震十年正月并州地震
殷殷有聲閏月秦州地震二月京師地震丙寅又震秦州地
震有聲三月京師及營州地震十九年二月光州地震東萊
之牟平虞邱山陷五所一處有水二十年正月并州地震四

月營州地震二十二年三月營州地震八月兗州地震九月
并州地震二十三年六月京師地震世宗景明元年六月秦
州地震四年正月涼州地震并州地震六月秦州地震十二
月秦州地震正始元年四月京師地震六月京師地震二年
九月恆州地震三年七月涼州地震殷殷有聲城門崩八月
秦州地震永明元年春正月秦州地震九月青州地震殷殷
有聲二年正月青州地震四年五月恆定二州地震殷殷有
聲十月恆州地震有聲如雷延昌元年四月京師及并朔相
冀定瀛六州地震恆州之繁時桑乾靈邱肆州之秀容鴈門
地震陷裂山崩泉湧殺五千三百一十人傷者二千七百二
十二人牛馬雜畜死傷者三千餘十月秦州地震有聲十一
月定肆二州地震十二月京師地震東北有聲二年三月濟

州地震有聲

闕

月京師地震三月正月有司奏肆州上言秀

容郡敷城縣自延昌二年四月地震於今不止四年正月華
州地震十一月地震從西北來殷殷有聲丁酉又地震從東
北來肅宗熙平二年十二月秦州地震有聲正光二年六月
秦州地震有聲東北引三年六月徐州地震孝靜武定三年
冬并州地震七年夏并州鄉郡地震又洪範傳曰山陽君也
水陰民也天戒若曰君道崩壞百姓將失其所也太祖天錫
六年春三月恆山崩世祖太延四年四月華山崩世宗景明
元年五月齊州山荏縣太陰山崩飛泉湧出殺一百五十九
人四年十一月恆山崩正始元年十一月恆山崩延昌三年
八月兗州上言泰山崩頽石湧泉十七處

隋志東魏武定二年十一月西河地陷

又後齊河清二年并州地震

又後周建德二年涼州地頻震城郭多壞地裂出泉

北史周建德六年青城門無故自崩

隋志開皇十四年五月京師地震二十年十一月天下地震

仁壽二年四月岐雍地震九月隴西地震三年梁州就谷山

崩大業七年砥柱山崩壅河逆流數十里

又開皇二十年立晉王廣為太子其夜烈風大雪地震山崩

民舍多壞壓死百餘口

王之不極是謂不建厥咎咎

齊志傳曰皇之不極是謂不建其咎在霧亂失聽故厥咎霧思心之咎亦

霧天者正萬物之始王者正萬物之始失中則害天氣類相動也天者轉於下而運於上雲者起於山而彌於天天氣動則其象應故厥罰常陰王者失中臣下強盛而蔽君明則雲陰亦衆多而蔽天光也

南史東昏偏信蔣侯神迎來入宮晝夜禱左右朱光尚詐云

見神動輒諮啟並云降福始安之中遂加位相國未又號爲
靈帝車服羽儀一依王者又曲信小祠日有十數師巫魔媪
迎送紛紜光尙輒託云神意范雲謂光尙曰君是天下要人
當思百全計光尙曰至尊不可諫正當託鬼神以達意耳後
東入樂游人馬忽驚以問光尙光尙曰尙見先帝大瞋不許
數出帝大怒拔刀與光尙等尋覓旣不見處乃縛菰爲明帝
形北向斬之懸首苑門上又帝著烏帽袴褶並備羽儀登南
掖門臨望又虛設鏡馬齋仗千人皆張弓拔白出東掖門稱
蔣王出盪又受刀敕等教著五音兒衣登城望戰還與御刀
左右及六宮於華光殿立軍疊以金玉爲鎧仗親自臨陣詐
被劊勢以板柵將去以此厭勝

齊志建元四年十月丙午日入後土霧勃勃如火烟永明二

年十一月己亥四面土霧入人眼鼻至辛丑止二年十一月
丙子日出後及日入後四面土霧勃勃如火烟六年十一月
庚戌丙夜土霧竟入昏塞濃厚至六日未時小開到甲夜仍
復濃密勃勃如火烟辛慘入人眼鼻八年十月壬申夜土霧
竟天濃厚勃勃如火烟氣入人眼鼻至九日辰時開除九年
十月丙辰晝夜恆昏霧勃勃如火烟其氣辛酸入人眼鼻兼
日色赤黃至四日甲夜開除十年正月辛酉初四面土霧
勃勃如火烟其氣辛慘入人眼鼻

南史天監十八年四月帝於無礙殿受佛戒又帝創同泰寺
至是開大通門以對寺之南門取反語以協同泰自是晨夕
講義多由此門三月辛未幸寺捨身甲戌還宮大赦改元大
通以符寺及門名又中大通元年九月幸同泰寺設四部無

遮大會上釋御服披法衣行清淨大捨以便省爲房素牀瓦
器乘小車私人執役甲午升講堂法坐爲四部大眾開涅槃
經題癸卯羣臣以錢一億萬奉贖皇帝菩薩大捨僧衆默許
乙巳百辟詣寺東門奉表請還臨宸極三請乃許帝三答書
前後稱頓首冬十月己酉又設四部無遮大會道俗五萬餘
人會畢帝御金輅還宮二年四月幸同泰寺設平等會三年
幸同泰寺升法座爲四部衆說涅槃經凡八日十一月又幸
同泰寺升法座爲四部衆說般若經迄于十二月五年二月
幸同泰寺設四部大會升法座發金字般若經題大同元年
三月幸同泰寺設無遮大會四月幸同泰寺鑄十方銀像并
設無礙會二年三月幸同泰寺設平等法會九月十月皆幸
同泰寺設無礙法會三年幸同泰寺鑄十方金銅佛像設無

礙法會幸阿育王寺設無礙法喜食中大同元年三月幸同
泰寺講金字三慧經仍施身夏四月丙戌皇太子以下奉贖
仍於同泰寺解設法會大赦改元是夜同泰寺災太清元年
三月幸同泰寺設無遮大會上釋御服服法衣行清淨大捨
名曰羯磨以五明殿爲房設素木牀葛帳土瓦器乘小輿私
人執役乘輿法服一皆屏除帝升光嚴殿講堂坐師子講金
字三慧經捨身夏四月庚寅羣臣以錢一億萬奉贖皇帝菩
薩僧衆默許戊寅百辟詣鳳莊門奉表三請三荅頓首並如
中大通元年故事丁亥服袞冕御輦還宮幸太極殿如卽位
禮帝爲法事人人讚善莫不從風或刺血灑地或刺血書經
穿心然燈坐禪不食及太清元年帝捨身光嚴重雲殿游仙
化生皆震動三日乃止當時謂之祥瑞識者以非動而動在

洪範爲妖以比石季龍之敗殿壁畫人頸皆縮入頭之類時海中浮骨山去餘姚岸可千餘里上有女人年三百歲有女官道士四五百人年並出百但在山學道遣使獻紅席帝方捨身時其使適至云此草常有紅鳥居下故以爲名觀其圖狀則鸞鳥也時有男子不知何許人於大衆中自割身以飴飢鳥血流徧體而顏色不變又沙門智泉鐵鉤掛體以然于燈一日一夜端坐不動開講日有三足鳥集殿之東戶自戶適於西南縣楣三飛三集白雀一見於重雲閣前連理樹又有五色雲浮於華林園昆明池上帝旣流遁益甚境內化之遂至喪亡云

又南史陳後主禎明三年正月乙丑朔朝會大霧四塞入人鼻皆辛酸

魏志班固說上不寬大包容臣下則不能居聖位貌言視聽
以心爲主四者皆失則區脊無識故其咎霧世祖太延四年
正月雨土如霧於洛陽高祖太和十二年十一月土霧竟天
六日不開到甲夜仍復濃密勃勃如火烟辛慘人鼻世宗景
明三年二月秦州黃霧雨土覆地八月濁氣四塞四年八月
涼州雨土覆地亦如霧正平二年正月夜陰霧四塞初黑後
赤三年正月土霧四塞九月黑霧四塞延昌元年二月黃霧
蔽塞

北史齊武平中每災異寇盜水旱亦不自貶損唯諸處設齋
以此爲修德雅信巫覡祈禱無方鑿晉陽西山爲大佛像一
夜燃油萬盆光照宮內又爲胡昭儀起大慈寺未成改爲穆
皇大寶林寺窮極工巧運石填泉勞費億計人牛死者不可

勝紀

厥罰恒陰

宋志宋後廢帝元徽三年四月連陰不雨八月多陰

隋志開皇二十年十月久陰不雨

厥極弱時則有射妖

隋志東魏武定四年後齊神武作宰親率諸軍攻西魏於玉壁其年十一月帝不豫班師將士震懼皆曰韋孝寬以定功弩射殺丞相西魏下令國中曰勁弩一發凶身自殞神武聞而惡之其疾暴增近射妖也

又齊武平後主自并州還鄴至八公嶺夜與左右歌而行有一人忽發狂意後主以爲狐媚伏草中彎弓而射之傷數人幾中後主後主執而斬之其不自覺也

北史文宣曾幸晉陽夜宿杠門嶺嶺有數株柏樹皆將千年
枝葉嫩茂似有神物所託時帝已被酒向嶺瞋罵射中一株
未幾立枯而死

時則有龍蛇之孽

宋志宋武帝永初元年七月青龍見義興陽羨八月青龍二
見南郡江陵文帝元嘉十三年九月己酉會稽郡西南向曉
忽大光明有青龍騰躍凌雲久而後滅吳興諸處竝以其日
同見光景揚州刺史彭城王義康以聞二十一年十月己丑
永嘉永嘉見黃龍自雲而下太守臧藝以聞二十五年五月
丁丑黑龍見元武湖北苑丞王世宗以聞五月戊戌黑龍見
玄武湖東北隈揚州野吏張立之以聞八月辛亥黃龍見會
稽太守孟顛以聞廣陵有龍自湖水中升天百姓皆見孝武

帝孝建二年七月癸丑黃龍見石頭城外水濱中護軍湘東
五彘以聞三年五月己未龍見臨川郡江州刺史東海王禕
以聞孝武大明元年五月癸亥黑龍見晉陵占石村改村爲
津里

齊志元徽三年太祖在清溪宅齋前池中忽揚波起浪湧水

如山有金石響須臾有青龍從池中出左右皆見之昇明元

年青龍見齊郡建元四年青龍見順

宋本諱作從

陽郡清水縣平

泉湖中永明七年黃龍見曲江縣黃池中一宿二日永興二
年山上雲幃四塞頃有玄黃五色如龍長十餘丈從西北升
天南史永元三年七月丙辰龍鬪於建康淮激水五里

隋志梁天監二年北梁州潭中有龍鬪潰霧數里龍蛇之孽
洪範五行傳曰龍獸之難害者也天之類君之象天氣害君

道傷則龍亦害鬪者兵革之象也京房易飛候曰衆心不安
厥妖龍鬪普通五年六月龍鬪於曲阿王陂因西行至建陵
城所經之處樹木皆折開數十丈時帝專以講經爲務不從
耕戰大清元年黎州水中又有龍鬪波浪湧起雲霧四合而
見白龍南走黑龍隨大同十年夏有龍夜因雷而墮延陵人
家井中明旦視之大如驢將以戟刺之俄見庭中及室中各
有大蛇如數百斛船家人奔走南史承聖二年三月有兩龍
見湘州西江三年主衣庫見黑蛇長丈許數十小蛇隨之舉
頭高丈餘南望俄失所在帝又與宮人幸玄洲苑復見大蛇
盤屈於前羣小蛇遶之並黑色帝惡之宮人曰此非怪也恐
是錢龍帝敕所司卽日取數千萬錢鎮於蛇處以厭之又退
居棲心省又有蛇從屋墮落帝帽上忽然便失又龍光殿上

所御肩輿復見小蛇縈屈輿中以頭駕夾膝前金龍頭上見人走去逐之不及城濠中龍騰出煥爛五色竦躍入雲六七小龍相隨飛去羣魚騰躍墜死於陸道龍處爲窟若數百斛圖舊大城上常有紫氣至時稍復消歇初二龍自南郡城西升天百姓聚觀五采分明江陵父老竊相泣曰昔年龍出建康淮西天下大亂今復有焉旣至無日矣

又陳太建十一年三月龍見南兗州池中南史永定三年正月大雪旦太極殿前有龍跡見後主時青龍出建陽門井涌又見大蛇中分首尾各走

魏志洪範論曰龍鱗蟲也生於水雲亦水之象陰氣盛故其象至也人君下悖人倫上亂天道必有篡殺之禍世祖神麈三年三月有白龍二見於京師人家井中真君六年二月丙

辰有白龍見於京師人家井中肅宗正光元年八月有黑龍如狗南走至宣陽門躍而上穿門樓下而出莊帝永安二年晉陽龍見於井中久不去前廢帝普泰元年四月甲寅有龍跡自宣陽門西出復入城乙卯羣臣入賀帝曰國將興聽於民將亡聽於神但當君臣上下克己爲治未足恃此爲慶

隋志東魏武安元年有大蛇見武牢城北史天平二年龍見并州人家井中

又後齊天保九年有龍長七八丈見齊州大堂河清元年龍見濟州浴堂中天統四年貴鄉人伐枯樹得一黃龍折脚死於孔中武平三年龍見邯鄲井其氣五色屬天又見汲郡佛寺澗井中七年并州招遠樓下有赤蛇與黑蛇鬪數日赤蛇死赤齊尙色黑周尙色鬪而死滅亡之象也琅邪王儼壞北

宮中白馬浮圖石趙時澄公所建見白蛇長數丈迴旋失所
在

又後周建德五年黑龍見於亳州而死

又開皇七年相州有桑門變為蛇尾繞樹而自抽長二丈許

又仁壽四年龍見代州總管府井中其龍或變為鐵馬甲士

彎弓上射之象

時則有馬既

齊志傳曰易曰乾為馬逆天氣馬多死故曰有馬既一日馬者兵象也將有寇戎之事故馬為怪

齊志建昌四年王晏出至草市馬驚走鼓布從車而歸十餘

日晏誅建武中南岸有一蘭馬走逐路止女子女子窘急走

入人家牀下避之馬終不置發牀食女子股脚間肉都盡禁

司以聞敕殺此馬是後頻有寇賊

隋志侯景僭尊號於江南每將戰其所乘白馬長鳴喋足者

輒勝垂頭者輒不利西州之役馬卧不起景拜請且箠之竟不動近馬旤也

又陳太建五年衡州馬生角洪範五行傳曰馬生角兵之象敗亡之表也

魏志洪範傳曰馬者兵象也將有寇戎之事故馬爲怪也肅宗熙平二年十一月辛未恒州送馬駒肉尾長一尺鬣處不生毛正光元年九月沃野鎮官馬爲蟲入耳死者十四五蟲似蠅長五寸已下大如楮

隋志齊天保中廣宗有馬兩耳間生角如羊尾

又大業四年太原廢馬死者大半帝怒遣使案問主者曰每夜殿中馬無故自驚因而致死帝令巫者視之巫者知帝將有遼東之役因希旨言曰先帝令楊素史萬歲取之將鬼兵

以伐遼東也帝大悅因釋主者十一年河東扶風三郡並有馬角長數寸義寧元年帝在江都宮龍廢馬無故而死旬日死至數百匹

時則有下人伐上之痾

齊志京房易傳曰生子二臂以上民謀其主三手以上臣謀其主二口以上國見驚

以兵三耳以上是為多聽國事無定二鼻以上國主久病三足三臂以上天下有兵其類甚多蓋以象占之按此所謂人痾也

宋志宋文帝元嘉十七年劉斌為吳郡婁縣有一女忽夜乘風雨怳忽至郡城內自覺去家正炊頃衣不沾濡曉在門上求通言我天使也斌令前因曰府君宜起迎我當大富貴不爾必有凶旤斌問所以來亦不自知也謂是狂人以付獄符其家迎之數日乃得去後二十日許斌誅孝武帝大明中張暢為會稽郡妾懷孕兒於腹中啼聲聞於外暢尋死大明末

荆州武寧縣人楊始歡妻於腹中生女兒此兒至今尚存明
帝泰豫元年正月巨人見太子西池水上跡長三尺餘後廢
帝元徽中南東莞徐坦妻懷孕兒在腹中有聲元徽中暨陽
縣女人於黃山穴中得二卵如斗大剖視有人形又元嘉四
年五月京師疾疫孝武帝大明元年四月京師疾疫四年四
月京邑疾疫

齊志永明五年吳興東遷民吳休之家女人雙生二兒胷以
下齊以上合

南史梁武伐郢郢城有數百毛人踰堞且泣因投黃鵠磯蓋
城之精也元帝承聖元年天門山獲野人出山三日而死
隋志大寶二年京口人於藏兒年五歲登城西南角大樓打
鼓作長江櫓鼓兵象也

又陳永定三年有人長三丈見羅浮山小石樓通身潔白衣服楚麗

北史聖武皇帝諱詰汾嘗田於山澤歛見輜輶自天而下既至見美婦人自稱天女受命相偶旦日請還期年周時復會於此言終而別及期帝至先田處果見天女以所生男授帝曰此君之子也當世爲帝王語訖而去卽始祖神元皇帝也故時人諺曰詰汾皇帝無婦家力微皇帝無舅家又太武帝太延元年有鄙婦人持方寸玉印詣潞縣侯孫家旣而亡去莫知所在印有三字爲龍鳥之形要妙奇巧不類人迹文曰早疫平

又齊文宣帝時霍州發楚王女冢尸如生焉得珠襦玉匣帝珍之還以歛焉又河清四年始將傳政於太子使內參乘子

尙乘驛送詔書於鄴子尙出晉陽城見人騎隨後忽失之尙未至鄴而其言已布矣武平四年四月祈皇祠壇墮藪之內忽有車軌之轍案驗傍無人跡不知車所從來

隋志開皇六年霍州有老翁化爲猛獸

又仁壽四年有人長數丈見於應門其迹長四尺五寸大業元年雁門人房回安母年百歲額上生角長二寸四年雁門宋谷村有婦生一肉卵大如斗埋之後數日所埋處雲霧盡合從地雷震而上視之洞穴失卵所在六年趙郡李來王家婢產一物大如卵六年正月朔旦有盜白衣練裙襦手持香花自稱彌勒佛出世入建國門奪衛士仗將爲亂齊王暕遇而斬之八年有澄公者若狂人於東都大叫唱賊帝聞而惡之十二年澄公又叫賊李密逼東都孟讓燒豐都市而去九

年帝在高陽唐縣人宋子賢善爲幻術每夜樓上有光明能變作佛形自稱彌勒出世又懸大鏡於堂上紙素上畫爲蛇爲獸及人形有人來禮謁者轉側其鏡遣觀來生形像或映見紙上蛇形子賢輒告云此罪業也當更禮念又令禮謁乃轉人形示之遠近惑信日數百千人遂潛謀作亂將爲無遮佛會因舉兵欲襲擊乘輿事泄鷹揚卽將以兵捕之夜至其所遶其所居但見火坑兵不敢進卽將曰此地素無坑止妖妄耳及進無復火矣遂擒斬之并坐其黨與千餘家其後復有桑門向海明於扶風自稱彌勒佛出世潛謀逆亂人有飯心者輒獲吉夢由是人皆惑之三輔之士翕然稱爲大聖因舉兵反衆至數萬官軍擊破之

時則有日月亂行星辰逆行維五位復建辟厥沴

南史永初三年十一月有星孛於營室景平元年正月有星孛於東壁十月又孛於氐元嘉十九年九月有客星在北斗因爲彗歷文昌五車畢天節天苑季冬乃滅二十六年十月彗見太微二十八年四月彗星見昴六月又見太微帝座齊志記七政陵犯流星雜占與諸史同是欲使諸緯別擇一無星之天而行也其慎甚矣故不載惟南史永元三年二月蚩尤旗見長星見竟天

南史普通元年九月有星晨見東方光爛如火中大通五年正月長星見

南史天嘉六年六月彗星見上台北光大二年六月彗星見太建六年四月彗星見七年四月有星孛於大角

魏志皇始元年六月有星彗於髦頭天興三年三月有星孛

於奎神瑞二年四月有星孛於天市五月彗出天市掃帝座
三年九月彗星孛北斗十二月又出天津泰常七年二月有
星孛於虛危八年正月彗出奎南太延二年五月星孛於房
真君三年九月星孛於天牢十年五月彗星出於昴十月又
見太微正平元年五月又見於卷舌六月逼帝座七月犯上
相出端門興安二年二月有星孛西方太安四年十一月長
星見奎和平元年十月又見天倉二年三月又出天津五年
十一月又出織女正始四年七月星孛於東北正光元年九
月彗見東方永安三年七月彗晨出東北天平二年星孛於
太微興和四年十月彗見南斗
北史天統元年六月彗出文昌東北
北史保定五年六月彗出三台經文昌上將紫宮入苑天和

三年六月星孛於東井

北史開皇八年十月有星孛於牽牛十四年十一月有星孛於角亢隋煬帝本紀大業三年長星出東壁二月彗見奎五月星孛於文昌四年九月彗出五車十二年九月枉矢出北斗十三年九月彗見營室

又曰田獵不宿飲食不享出入不節奪民農時及有姦謀則木不

曲直

宋明帝泰始二年五月丙午南瑯邪臨沂黃城山道士盛道度堂屋一柱自然夜光照室內此木失其性也或云木腐自光廢帝昇明元年吳興餘姚舍亭禾藪樹生李實禾藪樹民間所謂胡頹樹也宋文帝元嘉八年四月乙亥東莞莒縣松樹連理太守劉玄以聞又有木連理生東安新泰縣九年六

月木連理生營陽冷道太守展禽以聞十二年二月丁卯南
郡江陵庾和園甘樹連理荊州刺史臨川王義慶以獻三月
馬頭濟陽柞樹連理豫州刺史長沙王義欣以聞十四年二
月宮內螽斯堂梨樹連理豫州刺史長沙王義欣以聞南郡
江陵光祿之園甘李二連理十五年二月太子家令劉徵園
中林檎樹連理徵以聞十七年七月武昌崇讓鄉程僧愛家
侯風木連理江州刺史臨川王義慶以聞十月尋陽弘農祐
幾湖芙蓉連理臨川王義慶以聞十八年十二月木連理生
歷陽劉成之家南豫州刺史武陵王駿以聞二十年七月盱
眙考城縣柞樹二株連理南兗州刺史臨川王義慶以聞八
月木連理生汝陰豫州刺史劉遵考以聞二十一年木連理
生歷陽烏江南豫州刺史武陵王駿以聞木連理生晉陽無

錫南徐州刺史南譙王義宣以聞二十二年七月辛巳南頓
櫟連理豫州刺史趙伯符以聞九月木連理生建康建康令
張永以聞木連理生武昌江州刺史廬陵王紹以聞二十三
年二月辛亥木連理生南陰柔縣太守以聞木連理生淮南
當塗揚州刺史始興王濬以聞二十四年二月壬午臨川王
第梨樹連理臨川王□以聞七月壬子晉陵無錫穀櫟樹連
理南徐州刺史廣陵王誕以聞七月乙卯木連理生會稽諸
暨揚州刺史始興王濬以聞會稽太守楊玄保上改連理所
生處康亭村爲木連理村七月乙卯臨川王第梨樹連理臨
川王□以聞二十五年四月戊辰木連理生晉陽南徐州刺
史廣陵王誕以聞二十八年正月戊子木連理生尋陽柴桑
又生州城內江州刺史建平王宏以聞二十九年十月丁未

木連理生南琅邪太守劉成以聞孝武帝孝建二年三月己酉木連理生南郡江陵荊州刺史朱脩之以聞三年五月木連理生北海都昌冀州刺史垣護之以聞七月癸未木連理生歷陽歷陽太守袁敞以聞孝武帝大明元年正月乙亥木連理生高平二月壬寅華林園雙橘樹連理九月乙丑華林園梨樹連理十月丁丑朔木連理生豫章南昌二年四月辛丑木連理生汝南豫州刺史宗慤以聞三年九月甲午木連理生丹陽秣陵材官將軍范悅時以聞四年三月丁亥木連理生華林園曜靈殿北四月壬子木連理生華林園日觀臺北六月戊戌木連理生會稽山陰揚州刺史西陽王子尚以聞五年閏九月木連理生邊城豫州刺史垣護之以聞十二月戊寅淮南松木連理豫州刺史尋陽王子房以聞六年二

月乙丑木連理生晉陵南徐州刺史新安王子鸞以聞四月
戊辰木連理生營陽湘州刺史建安王休仁以聞八月乙丑
木連理生彭城城內徐州刺史王玄謨以聞七年正月己酉
珊瑚連理生鬱林始安太守劉劬以聞明帝泰始二年七月
木連理生丹陽秣陵四年三月庚戌太子西池冬生樹連理
園丞周禽猗以獻六年四月丙午木連理生會稽永興太守
蔡興宗以聞十二月壬辰木連理生豫章南昌太守劉惔之
以聞七年二月戊寅木連理生吳郡錢唐太守王延之以聞
昇明二年木連理生豫州界內史劉懷珍以聞

南齊志宋泰豫元年京師祗祖寺皂莢樹枯死昇明末忽更
生花葉建元元年朱爵桁華表柱生枝葉建元初李子生毛
二年武陵沅頭都尉治有桑樹方冬生葉四年巴州城西鼓

樓脚栢柱數百年忽生花永明六年石子岡栢木長二尺四寸半化爲石永明中大桁一舶無故自沉艚中無水隆昌元年廬陵王子卿齋屋梁柱際無故出血建武初始安王遙光治廟截東安寺屋以直廟垣截梁水出如淚 又昇明二年四月昌國縣徐萬年門下棠樹連理九月豫州萬歲澗廣數丈有樹連理隔澗騰枝相通越壑跨水爲一幹建元二年九月有司奏上虞縣楓樹連理兩根相去九尺雙株均聳去地九尺合成一幹故障縣楓樹連理兩株相去七尺大八圍去地一丈仍相合爲樹泯如一木山陽縣界若邪村有一槻木合爲連理淮陰縣建業寺梨樹連理建康縣梨樹耀榱一本作耀攘五圍連理六枝永明元年五月木連理生安成新喻縣又生南梁陳縣閏月璿明殿外閣南槐樹連理八月鹽官縣內

樂村木連理二年七月烏程縣陳文則家槿樹連理七月新
冶縣槐栗二木合生異根連理去地數尺中央小開上復爲
一三年正月安城縣榆樹二株連理二月安陽縣梓樹連理
九月句陽縣之穀山槿樹連理異根雙挺共杪爲一十二月
永寧左郡楠木連理四年二月秣陵縣高天明園中李樹連
理生高三尺五寸兩枝別生復高三尺復爲一幹五年正月
秣陵縣華僧秀園中四樹連理六年四月江寧縣北界賴鄉
齊平里三成邏門外路東太常蕭惠基園椶樹二株連理其
高相去二尺南大北小小者傾柯南附合爲一樹枝葉繁茂
圓密如蓋七年江寧縣李樹二株連理兩根相去一丈五尺
八年巴陵郡樹連理四株三月武陵白沙戍槻木連理相去
五尺俱高三尺東西二枝合而通柯十二月柴桑縣陶委天

家樹連理又永明五年三陰縣孔廣家園檉樹十二層會稽
太守隨王子隆獻之種芳林園鳳光殿西九年秣陵縣鬪場
里安明寺有古樹衆僧改架屋宇伐以爲薪剖樹木裏自然
有法大德三字始興郡本無欂樹調味有闕世祖在郡堂屋
後忽生一株

魏志太祖天興三年四月有木連理生於代郡天門關之路
左八月渤海上言脩縣東光縣木連理各一十二月豫州上
言木連理生於河內之沁縣四年春河內郡木連理二八月
魏郡上言內黃縣木連理太宗泰常元年十月范陽郡上言
木連理十一月常山郡上言木連理三年正月渤海上言東
光縣木連理八月廣陵郡上言木連理世祖神麋四年九月
滎陽郡上言木連理延和二年三月樓煩南山木連理三年

九月上谷郡上言木連理太延元年二月魏郡上言木連理
五年二月遼西上言木連理高祖延興元年十一月秘書令
楊崇奏鍾律卽李生於京師見長生連理樹承明元年九月
并州上言木連理相去一丈二尺中有五枝相連太和元年
三月冀州上言木連理十七年六月京師木連理十八年十
月河南上言鞏縣木連理二十三年十月并州上言百節連
理生縣甕山濟州上言木連理十二月瀛州上言木連理世
宗景明二年正月瀛州上言平舒縣木連理三年正月潁川
郡上言木連理二月平陽郡上言襄陵縣木連理四月荊州
上言南陽宛縣木連理六月徐州上言東海木連理十月秦
州上言南稻新興二縣木連理各一四年二月趙平郡上言
鶉觚縣木連理二月齊郡上言臨淄縣木連理四月汾州上

言五城郡木連理五月青州上言莒縣木連理六月恒農盧氏縣木連理是月徐州上言梁郡下邑縣木連理九月秦州上言當亭四縣界各木連理正始元年五月司州上言滎陽京縣木連理六月京師西苑木連理七月河東郡上言聞喜縣木連理八月河南郡上言慈水濱木連理十月恒農郡上言嶠縣木連理十二月涼州上言石城縣木連理二年正月汾州上言平昌縣木連理二月司州上言潁川陽翟縣木連理三年六月汾州上言永安縣木連理是月京師木連理七月潁川陽翟縣上言木連理是月建德郡上言石城縣木連理永平元年四月司州上言潁川郡木連理二年四月司州上言恒農北陝縣木連理三年十一月夏州上言橫風山木連理延昌二年正月徐州上言建陵戍木連理三年正月司

州上言軹縣木連理四年三月冀州上言信都縣木連理六月京師木連理九月雍州上言鄆縣木連理肅宗熙平元年正月光州上言曲城縣木連理二年十一月京師木連理十二月敦煌鎮上言晉昌戍木連理神龜元年正月汾州上言永安縣木連理三月滄州上言饒安縣木連理八月燕州上言上谷縣木連理九月秦州上言隴西之武陽山木連理二年六月夏州上言山鹿縣木連理正光元年五月并州上言上黨東山谷中木連理十一月齊州上言濟南郡靈壽山木連理二年六月齊州上言魏郡逢陵縣木連理二年二月涼州上言榆中縣木連理三月青州上言平昌縣木連理八月徐州上言龍亢戍東木連理二四年二月揚州上言汝陰縣木連理八月涼州上言顯美縣木連理孝昌元年十月魏郡

元城縣木連理孝靜天平二年四月臨水郡木連理七月魏
郡木連理三年五月司州上言清河縣木連理四年六月廣
平郡上言木連理八月并州上言木連理元象元年二月洛
州上言木連理五月林慮縣上言木連理八月上黨郡上言
木連理興和元年九月有司奏西山採材司馬張神和上言
司容谷木連理二年四月光州上言盧鄉縣木連理武定元
年閏月西兗州上言濟陰郡木連理九月齊獻武王上言并
州木連理三年九月瀛州上言河間郡木連理五年十一月
汾州上言木連理六年五月晉州上言木連理八年四月青
州上言齊郡木連理

隋志齊後主武平五年鄴城東青桐樹有如人狀京房易傳
曰王德衰下人將起則有木生如人狀七年宮中有樹大數

圍夜半無故自拔

又隋開皇八年四月幽州人家以白楊木懸竈上積十餘年忽生三條皆長三尺餘甚鮮茂仁壽二年春蓋屋人以楊木為屋梁生三條長二尺仁壽元年十月蘭州楊樹上松生高三尺六節十二枝宋志曰松不改柯易葉楊者危脆之木此永久之業將集危亡之地也四年八月河間柳樹四株無故枯落既而花葉復生京房易飛侯謂之曰木再榮

棄法律逐功臣殺太子以妾為妻則火不炎上

齊志火南揚光輝出炎爚為明者也

人君向明而治蓋取其象以知人為分讒佞既遠羣賢在位則為明而火氣從矣人君疑惑棄法律不誅讒邪則讒口行內間骨肉外疎忠臣至殺太子逐功臣以妾為妻則火失其性上災宗廟下災府榭內燠本朝外燠闕觀雖興師眾不能救也隋志洪範五行傳曰火者南方陽光為明也人君向南蓋取象也昔者聖帝明王負展攝袂南面而聽斷天下攬海內之雄俊積之於朝以續聰明推邪佞之偽臣投之於野以通壅塞以順火氣夫不明之君惑於讒口白黑雜揉代相是

非衆邪並進人君疑惑棄法律間骨肉殺太子逐功臣以孽代宗則火失其性

宋志宋文帝元嘉五年正月戊子京邑大火七年十二月乙亥京邑火延燒太社北牆二十九年三月壬午京邑大火風雷甚壯後廢帝元徽三年正月己巳京邑大火三月戊辰京邑大火燒二岸數千家南史永明十一年七月先是魏地謠言赤火南流喪南國是歲有沙門從北齋此火而至色赤於常火而微云以療疾貴賤爭取之多得其驗二十餘日都下大盛咸云聖火詔禁之不止

齊志永明三年正月甲夜西北有野火光上生精西北有四東北有一其長七八尺黃赤色三月庚午丙夜北面有野火上生精長六尺戊夜又有一枚長五尺竝黃赤色四年正月丁亥夜有火精三處閏月丁巳夜有火精四處十二月辛酉

夜東南有野火精二枚五年十二月丙寅夜西北有野火
上生精一枚長三尺黃白色六年十一月戊申夜西南及北
三面有野火火上生精九枚竝長二尺黃赤色九年二月丙
寅甲夜北面有野火火上生精二枚西北又一枚竝長三尺
須臾消永元二年八月宮內火燒西齋璿儀殿及昭陽顯陽
殿北至華林牆西及祕閣北屋三千餘間京房易傳曰君不
思道厥妖火燒宮祕閣與春秋宣榭火同天意若曰旣無紀
綱何用典文爲也南史惟東閣內明帝舊殿數區及太極以
南得存餘皆蕩盡二年冬京師民間相驚云當行火災南岸
人家往往於籬間得布火纏者云公家以此禳之三年正月
豫章郡天火燒三千餘家二月乾和殿西廂火燒屋三十間
又元嘉十七年六月己未世祖夜生無火婢吹灰而火自然

隋志梁天監元年五月有盜入南北掖燒神武門總章觀普
通二年五月琬琰殿火延燒後宮三千餘間中大通元年朱
雀航華表災明年同泰寺災大同三年朱雀門災水沴火也
是時崇尚佛道宗廟牲牷皆以麵代之又委萬乘之重數詣
同泰寺捨身爲奴令王公已下贖之初陽爲不許後爲嘿許
方始還宮天誠若曰梁武爲國主不遵先王之法而淫於佛
道橫多糜費將使其社稷不得血食也江陵之敗闔城爲賤
隸焉捨身爲奴之應也

又陳永定三年重雲殿災南史陳後主於郭內大皇佛寺起
七層塔未畢火從中起飛至石頭燒死者甚衆

魏志高宗太安五年春三月肥如城內大火官私廬舍焚燒
略盡唯有東西二寺佛圖像舍火燭不及高祖太和八年五

月河內沁縣澤自然稍增至百餘步五日乃滅世宗景明元
年三月恒岳祠災肅宗正光元年五月鈎盾禁災孝昌二年
夏幽州遵縣地然三年春瀛州城內大火燒三千餘家出帝
永熙三年三月并州三級寺南門災孝靜天平四年秋鄴都
閭闔門東闕火此甚於春秋宣榭火矣闕者象魏懸象之所
天意若曰象不足懸魏不魏矣武定三年冬十月汾州西河
郡北山原有火潛行地下熱氣蒸蒸上出

隋志東魏天平二年十一月閭闔門災四年六月又災武定
五年八月廣宗郡火燒數千家北史天平元年二月永寧寺
九層浮屠災旣而人有從東萊至云及海上人咸見之於海
中俄而霧起乃滅說者以爲天意若曰永寧見災魏不寧矣
飛入東海勃海應矣又後齊後主天統三年九龍殿災延燒

西廊四年昭陽宣光瑤華三殿災延燒龍舟

又開皇十四年將祠泰山令使者致石像神祠之所未至數里野火歛起燒像碎如小塊大業十二年顯陽門災舊名廣陽時帝不遵法度驕奢荒怠裴蘊虞世基之徒阿諛順旨掩塞聰明宇文述以讒邪顯進忠諫者咸被誅戮天戒若曰信讒害忠則除廣陽也

治宮室飾臺榭內淫亂犯親戚侮父兄則稼不成

隋志洪範五行傳曰土者中央

為內事宮室臺榭夫婦親屬也古者自天子至於士宮室寢居大小有差高卑異等骨肉有恩故明王賢君修宮室之制謹夫婦之別加親戚之恩敬父兄之禮則中氣和人君肆心縱意大為宮室高為臺榭雕文刻鏤以疲人力淫泆無別妻妾過度犯親戚侮父兄中氣亂則稼穡不成

南史陳太建十年八月隕霜殺稻菽

魏志京房易傳曰興兵妄誅茲謂亡法厥災霜夏殺五穀冬

殺麥誅不原情茲謂不仁夏先大霜太祖天賜五年七月冀
州霽霜世祖太延元年七月大霽霜殺草木高宗和平六年
四月霽霜高祖太和三年七月雍朔二州及枹罕吐京薄骨
律敦煌仇池鎮並大霜禾豆盡死六年四月潁川郡霽霜七
年三月肆州風霜殺菽九年四月雍青二州霽霜六月洛肆
相三州及司州靈邱廣昌鎮霽霜十四年八月汾州霽霜世
宗景明元年四月夏州霽霜殺草六月建興郡霽霜殺草八
月雍并朔夏汾五州司州之正平平陽潁暴風霽霜二年三
月齊州霽霜殺桑麥四年三月雍州霽霜殺桑麥青州霽霜
殺桑麥正始元年五月武川鎮霽霜六月懷朔鎮霽霜七月
東秦州霽霜八月河州霽霜殺錄二年四月齊州霽霜五月
恆汾二州霽霜殺稼七月幽岐二州霽霜敦煌霽霜恆州霽

霜三年六月安州霽霜四年三月幽州頻霽霜四月敦煌頻
霽霜八月河州霽霜永平元年三月幽岐二州霽霜并州霽
霜四月敦煌霽霜二年四月武州鎮霽霜延昌四年三月河
南八州霽霜肅宗熙平元年七月河南北十一州霽霜

隋志齊後主武平四年山東饑是時大興土木之功於仙都
苑又起宮於邯鄲窮侈極麗後宮侍御千餘人皆寶衣玉食
逆中氣之咎也

又煬帝大業五年燕代齊魯諸郡饑先是建立東都制度崇
侈又宗室諸王多遠徙邊郡

好攻戰輕百姓飭城郭侵邊竟則金不從草

齊志金者西方萬物
既成殺氣之始也其
於王事兵戎戰伐之道也王者興師動眾建立旗鼓使旌把
鉞以誅殘賊止暴亂殺伐應義則金氣從工冶鑄化草形成
器也人君樂侵陵好攻戰貪城邑輕百姓之命人民不安內
外騷動則金失其性益冶鑄不化水滯固堅故曰金不從草

又曰維木
診金也

宋志宋後廢帝元徽四年義熙晉陵二郡並有霹靂車墜地
如青石草木焦死

齊志建武四年明帝出舊宮送豫章王第二女綏安主降嬪
還上輦輦上金翅無故自折落地

南史梁承聖二年二月己卯江夏宮南門籥牡飛

隋志陳禎明二年五月東冶鐵鑄有物赤色大如斗自天墜
鎔所隆隆有聲鐵飛破屋而四散燒人家天戒若曰陳國小
而兵弱當以和好為固無鑄兵而黷武以害百姓

簡宗廟不禱祠廢祭祀逆天時則水不潤下

宋志謂水失其性而為災也齊志水北方冬藏萬物氣至陰也宗廟祭祀之象死者精神放越不反故為之廟以收其散為之貌以收其魂神而孝子得盡禮焉敬之至則神歆之此則至陰之氣從則水氣從溝瀆隨而流去不為民害矣人君不禱祠簡宗廟廢祭祀逆天時則霧水暴

出川水逆溢壤邑軼鄉沈溺民人故曰水不潤下洪範五行傳曰水者北方之藏氣至陰也宗廟者祭祀之象也故天子親耕以供粢盛皇后親蠶以供祭服敬之至也發號施令十二月咸得其氣則水氣順

宋志宋文帝元嘉五年六月京邑大水十一年五月京邑大水十二年六月丹陽淮南吳興義興五郡大水十八年五月江水汎溢沒居民害苗稼十九年二十年東都諸郡大水二十九年五月京邑大水孝武帝孝建元年八月會稽大水平地八尺孝武帝大明元年五月吳興義興大水四年八月雒州大水南徐南兗州大水後廢帝元徽元年六月壽陽大水順帝昇明元年七月雒州大水甚於關羽樊城時二年二月於潛翼異山一夕五十二處水出流漂居民七月丙午朔濤水入石頭居民皆漂沒又孝武帝孝建三年九月濟河清冀州刺史垣護之以聞孝武帝大明五年九月庚戌河濟俱

清平原太守申纂以聞明帝泰始元年二月丙寅淮揚水清

潔有異於常州治中從事史張緒以聞水緩沙停河欲決也南史元嘉

十七年八月徐兗青冀四州大水大明二年九月襄陽大水

元徽三年三月都下大水大水甚烈

齊志建元二年吳興義興三郡大水三年夏丹陽吳二郡

大水四年大水永明五年夏吳興義興水雨傷稼六年吳興

義興二郡大水建武二年冬吳晉陵二郡水雨傷稼永元元

年七月濤入石頭漂殺緣淮居民應本傳荊州城內有沙池

常漏水蕭穎胄爲長史水乃不漏及穎胄亡乃復竭

隋志梁天監二年六月大末信安安豐三縣大水春秋考異

郵曰陰盛臣逆人悲則水出河決六年八月建康大水濤上

御道七尺七年五月建康又大水十二年四月建康大水中

大通五年五月建康大水御道通船京房易飛侯曰大水至國賤人將貴

南史陳禎明二年大風自西北激濤水入石頭城淮渚暴溢漂沒舟乘

魏志洪範傳曰大水者皆君臣治失而陰氣穡積盛彊生水雨之災也太祖天賜三年八月霖雨大震山谷水溢太宗泰常三年八月河內大水世祖延和元年六月京師水溢壞民廬舍數百家真君八年七月平州大水高祖太和二年夏四月南豫徐兗州大霖雨六年七月青雍二州大水八月徐東徐兗濟平豫光七州平原枋頭廣阿臨濟四鎮大水九年九月南豫朔二州各大水殺千餘人二十二年戊午兗豫二州大霖雨二十三年六月青齊光南青徐豫兗東豫八州大水

世宗景明元年七月青齊南青光徐兗豫東豫司州之潁川
汲郡大水平隰一丈五尺民居全者十四五正始二年青徐
州大雨霖海水溢出於青州樂陵之隰沃縣流漂一百五十
二人永平三年七月州郡二十大水延昌元年夏京師及四
方大水二年五月壽春大水肅宗熙平元年六月徐州三月
大水二年九月冀瀛滄三州大水正光二年夏定冀瀛相四
州大水孝昌三年秋京師大水出帝太昌元年六月庚午京
師大水穀水汎溢壞三百餘家孝靜元象元年定冀瀛滄四
州大水興和四年滄州大水又太宗泰常五年十二月湧泉
出於平城高宗和平五年十一月鴈門泉水穿石湧出前廢
帝普泰元年秋司徒府太倉前井並溢孝靜天平四年七月
泰州井溢元象元年二月鄴城西南有枯井溢

北史元象元年夏山東大水蝦蟆鳴於樹上

隋志後齊河清二年十二月兗趙魏三州大水天統三年并
州汾水溢讖曰水者純陰之精陰氣洋溢者小人專制武平
六年八月山東諸州大水京房易飛侯曰小人踊躍無所畏
忌陰不制於陽則涌水出北史天統三年山東大水人饑僵
尸滿道武平六年八月冀定趙幽滄瀛六州大水北史河清
自元年河濟清又開皇十八年河南八州大水仁壽二年河南
河北諸州大水京房易傳曰顛事有智誅罰絕理則厥災水
大業三年河南大水漂沒三十餘郡隋煬帝紀作七年山東
河南大水云云民相賣爲奴婢

按稼穡惟寶故書紀嘉禾所謂豐年爲瑞也自茲以降於文反
正爲乏於物反常爲妖史臣著之蓋有不得已者若夫鐘鼎玉

石之文新垣平之故智也神仙靈異之言素伏符之改轍也鄙夫以之幸進中主以之震矜掘地及泉而名曰醴後園得露而號以甘又日再中之別調也獵者得兔而訝其白羅者獲鳥而異其蒼更遼東豕之陋見也夫人主好諛諸臣固寵欲稱以瑞何患無辭今槩畧之懼惑聽也龍感常羊狐瑞石紐有天命者自異於人然追尼父語怪之訓刪鄭君履武之箋飛龍之德益光逐鹿之心載戢宋徵諸鬼何以防民茲雖備錄其原文不過愛憐其故籍何者古之王天下也積功者十餘世累仁者數百年樂推已集僉思丹穴之熏謳歌已屬猶有陽城之辟迨夫寶圖地呈元玉天錫而彌懷慙德推而弗居八季陰謀譎智飾詐欺愚以莽操之衣鉢汗唐虞之盛典用情極險傳世益促甚或南郊方升望夷已禍建章之火不息軒轅之台誰畏而謂河洛

等瑞星雲協輝悠悠蒼天胡爲此醉是知佐命宗臣蕃國惟舊
搆無稽之虛說惑未厭之羣情吾誰欺乎此之謂矣生陽大旱
之沴鶴館見災久陰不雨之徵昌邑示戒恐懼修省理亦宜之
然而賀良誣世旣挾忠可之書睦孟荒唐遂假仲舒之說左道
惑衆職此之由緣有舊史不能盡汰爾

按連理木及倉白鳥獸
史以爲瑞故詳載之云